

明覺禪師語錄卷第一

詩三

參學小師惟蓋竺編

住蘇州洞庭翠峯禪寺語

師在萬壽開堂日白槌了師云宗乘一唱三藏絕詮祖令當行十方坐斷其有達士不避死生貶上眉毛出衆相見問人天普集佇聽雷音學人上來乞師垂示師云十萬八千不是遠進云恁麼則大衆雷恩也師云後五日看問師唱誰家曲宗風嗣阿誰師云分明記取進云恁麼則昔日智門今朝和尚師云有甚麼交涉問如何是和尚爲人一句師云量才補職學云謝師方便師云自領出去師乃云一問一答總未有事在直饒乾坤大地草木叢林盡爲衲僧異口同聲各置百千問難也不消長老彈指一下並乃高低普應前後無差曠祖佛之妙靈廓天人之幽迹如是則何假覺城東際五衆咸居古佛廟前此時參畢

師在杭州靈隱受疏了衆請陞座時有僧問寶座先登於此日請師一句震雷音師云徒

勞側耳進云恁麼則一音普徧於沙界大衆無不盡咸聞師云忽有人問爾作麼生舉僧云三十年後敢爲流芳師云賺了也師乃云天下絕勝之覺場靈隱導師之廣座暫借卑僧陞陟實愧非材豈敢於五百員衲子前提唱佛祖抑揚古今銜耀見知恥他先作假饒說得天雨四華地分六震於曹溪路上一點使用不著何以行脚高士有把定世界函蓋乾坤底眼誰敢錯悞絲毫其知有者必共相悉

師在靈隱諸院尊宿茶筵日衆請陞座僧問禪侶盡臨於座側未審師還說也無師云寰中天子塞外將軍進云恁麼則一震雷音滿大唐也師云看取令行師乃云上士相見一言半句如擊石出火警爾便過應非即言定旨滯句迷源從上宗乘合作麼生議論直得三世諸佛不能自宣六代祖師全提不起一大藏教詮注不及所以棒頭取證喝下承當意向交馳並同流浪其有知方作者相共證明

師到蘇州日僧俗迎在萬壽衆請上堂問向上一路千聖不傳和尚從何而得師云將謂是衲僧學云恁麼則大衆雷恩學人禮謝也師云龍頭蛇尾問選佛場開還許學人選也無師云切忌點額學云恁麼則心空及第歸也師云塔下漢師乃云如天普蓋似地普擊有如是自在具如是威德誰不承恩誰不景慕過去諸聖於無量劫勤苦受盡所得秘要法門今將普示大衆不用纖毫心力各請一時驗取於此薦得便能永出四流高步三界其或不知剛是諸人諱却

師初到院陞座僧問杖錫已居於此日請師一句定乾坤師云百雜碎進云恁麼則海晏河清去也師云非公境界問如何是佛法大意師云龍吟霧起虎嘯風生問如何是祖師西來意師云山高海闊進云學人不會師云緊悄草鞋師乃云未來翠峯多人疑著及乎親到一境蕭然非同善財入樓閣之門暫時欽念莫比維摩掌中世界別有清規冀諸人飽足觀光以資欣慰

上堂問答罷師乃云釋迦已滅彌勒未生正當今日佛法委在翠峯放開捏聚總由者裏放開也七縱八橫是處填溝塞壑捏聚也天下老和尚盡在拄杖頭不消一剎

上堂僧問如何是實學底事師云針劄不入進云乞師方便師云水到渠成問如何是教外別傳一句師云看看臘月盡學云恁麼則流芳去也師云瘧子喫苦瓜問言迹之與異途之所由生不犯鋒銜請師道師云誰家無白月清風進云還當也無師云土上加泥漢師乃云劍輪飛處日月沉輝寶杖敲時乾坤失色衆魔從茲膽裂千聖由是眼開其如二聽不圓震迅雷而莫覺孤根將敗霈春雨以非滋致使凡聖岐分悟迷派列奔馳七趣汨沒四流重業相纏無有休日爾諸禪德觀善衆詳如人上山各自努力

上堂僧問昭昭於心目之間而相不可觀杲杲是在色塵之內而理不可分既於心目之間爲甚麼不覩其相師云華須連夜發莫待曉風吹進云恁麼則雲散家家月師云毗婆尸

佛早留心僧方禮拜師以拄杖打一下云不得放過問猿抱子歸青嶂後鳥銜華落碧巖前古人意旨如何師云夾山猶在學云和尚如何師云依稀似曲纔堪聽又被風吹別調中僧却問如何是翠峯境師云春至桃華亦滿溪僧禮拜師云山僧今日敗闕有人點檢得出許他頂門上一隻眼便下座

上堂僧問古人借問田中事插鋤又手意如何師云人從陳州來不得許州信問古人道有讀書人到來意旨如何師云且在門外立學云請師相見師云任是顏回亦不通師乃云立賓立主剗肉作瘡舉古舉今拋沙撒土直下無事正是無孔鐵槌別有機關合入無間地獄明眼衲子應須自看

上堂僧問古人一喝不作一喝用是否師云是僧便喝師便棒僧無語師云謹我問古人道有佛法處不得住無佛法處急走過意旨如何師云氣急殺人僧擬議師云甚麼處去也問只在目前爲恁麼再三不覩師云截耳卧街僧云恰是師云令我攢眉問黑豆未生

芽時如何師云餒驢餒馬進云生後如何師云透水透沙僧禮拜師云一似不齋來問功巧諸技藝盡現行此事如何是此事師云諸方榜樣進云莫便是學人會處也無師云有頭無尾漢師乃云過去諸如來斯門已成就放過一著現在諸菩薩今各入圓明兩重公案未來修學人總被翠峯穿却鼻孔

上堂云智者聊聞猛提取莫待須臾失却頭問丹霄獨步時如何師云脚下踏索進云天橫行去也師云徐六擔板問學人乍入叢林諸事不會未審師還拯濟也無師云蘇州紙貴進云和尚豈無方便師云腦後拔楸師云爐鞴之所固無鈍鐵良醫之門誰是病夫向後鼻孔遼天莫辜負人好

上堂云欲得不招無間業莫謗如來正法輪便下座
上堂纔有僧出禮拜師云大衆一時記取者僧話頭便下座
上堂大衆雲集以拄杖拋下云棒頭有眼明如日要識真金火裏看

上堂云從天降下從地湧出南北東西一棚
俊鶻顧杼停機苦屈苦屈

上堂云古人道譬如擲劍揮空莫論及之不
及斯乃空輪絕跡劍刃非虧好諸禪德若能
如是心心無知即是踞妙峯孤頂非但善財

七日不逢設使文殊百劫親來也摸捺不著
上堂有僧出禮拜了方伸問師云啼得血流
無用處便下座

上堂云藏鋒劍客便請施呈有僧方出來師
云什麼處去也便下座

上堂云語漸也返常合道且任諸人點頭論
頓也不留朕跡衲僧又奚爲開口師以拄杖
一劃云上無衝天之計下無入地之謀蔡州
千箇萬箇打破只在須臾

上堂問答罷乃云映眼時若干日萬像不能
逃影質凡夫只是未曾觀何得自輕而退屈
師拈起拄杖云把定世界不漏絲髮還觀得
也無所以雲門大師道直得乾坤大地無纖
毫過患分只是轉句不見一色猶爲半提直
得如此更須知有全提時節諸上座翠峯若

也全提盡大地人並須結舌放一線道轉見
不堪以拄杖一時趁下

上堂僧問如何是翠峯境師云有眼底見學
云如何是境中人師云貪觀白浪失却手棹
問如何是和尚家風師云客來須看進云恁

麼則學人得見也師云三十年後問如何是
第一義師云道士倒騎牛學云乞師再垂方
便師云無孔鐵槌問道遠乎哉師云青山夾
亂流學云恁麼則得聞於未聞去也師云千

里萬里師乃云大眾前共相誦唱也須是箇
漢始得若未有奔流度刃底眼不勞拈出所
以道如大火聚近著則燎却面門亦如按太

阿寶劍衝前則喪身失命師乃頌云太阿橫
按祖堂寒千里應須息萬端莫待冷光輕閃
爍復云看看便下座

拈古

舉米胡問僧近離甚處僧云藥山米云藥山
近日如何僧云大似頑石一般米云得恁麼
鄭重僧云也無提撥處米云非但藥山米胡
亦恁麼僧近前顧視而立米云看看頑石動

也其僧便出師拈云米胡也縱奪可觀爭奈
死而不吊

舉蜀賓國王仗劍詣師子尊者所乃問師得
蘊空否尊者云已得王曰可施我頭尊者曰
身非我有豈況於頭王遂斬之白乳高丈餘

王臂自落師拈云作家君王天然有在
舉鏡清於僧堂前自擊鍾子云玄沙道底玄

沙道底時有僧出來云玄沙道什麼鏡清作
一圓相僧云若不久參爭知恁麼清云還我
草鞋錢來師拈云泊被打破蔡州

舉寶公云終日拈香擇火不知身是道場玄
沙云終日拈香擇火不知真箇道場師拈云
一對無孔鐵槌

舉五通仙人問佛云佛有六通我有五通如
何是那一通佛召五通仙人仙人應諾佛云
那一通爾問我師云老胡元不知有那一通
却因邪打正

舉思和尚令石頭送書去讓和尚處云迴日
與子箇鉏斧子住山去石頭纔到讓和尚處
便問不慕諸聖不重己靈時如何讓云子問

太高生何不向下問將來石頭云乍可永劫
沉淪不求諸聖解脫便歸思和尚問書達否
石頭云書亦不達信亦不通去日蒙和尚許
鉗斧子便請思垂下一足石頭便禮拜拈
云石頭泊擔板過却又云大小讓師不解據

令

舉長髭到石頭處頭問什麼處來髭云嶺南
來石頭云大庾嶺頭一鋪功德還成就也未
髭云成就久矣只欠點眼石頭云莫要點眼
麼髭云便請石頭垂下一足髭便禮拜石頭
云見什麼道理便禮拜髭云如紅爐上一點
雪石頭便休師拈云無眼功德有什麼點處
德山和尚到龍潭問久響龍潭及手到來潭
又不見龍又不現龍潭云子親到龍潭德山
便休去師拈云將錯就錯又云大小德山

師一日因事舉往日有老宿一夏不為師僧
說話有僧自歎云我只恁麼空過一夏不望
和尚說佛法得聞正因兩字也得老宿聊聞
云聞黎莫增速若論正因一字也無恁麼道
了扣齒云適來無端恁麼道隣壁有老宿聞

云好一釜羹被兩顆鼠糞污却師拈云誰家
鍋釜無一兩顆

觀和尚見新到來觀作麵引次示之其僧便
去觀晚間問第一座今日新到在什麼處第
一座云當時去也觀云是即是只得一椀師

拈云老觀大似失錢遭罪

舉外道問佛不問有言不問無言世尊據坐
外道禮拜云世尊大慈大悲開我迷雲令我
得入外道去後阿難問佛外道有何所證而
言得入佛云如世良馬見鞭影而行師拈云

邪正不分過猶鞭影

傅大士云夜夜抱佛眠朝朝還共起起坐鎮
相隨如身影相似要識佛去處只者語聲是
玄沙云大小傅大士只認得箇昭昭靈靈師
拈云玄沙也是打草蛇驚

寶公令人傳語思大和尚何不下山教化衆
生目視雲漢作什麼思大云三世諸佛被我
一口吞盡何處更有衆生可度師拈云有什
麼屎臭氣

趙州云至道無難唯嫌揀擇纔有語言是揀

擇是明白老僧不在明白裏是爾作麼生護
惜時有僧問云既不在明白裏護惜箇什麼
州云我亦不知僧云和尚既不知爲什麼道
不在明白裏州云問事即得師拈云趙州到
退三千

南泉示衆云三十年來牧一頭水牯牛欲擬
東邊放不免侵他國王水草欲擬西邊放不
免侵他國王水草不如隨分納些子免被官
主勞撓長慶云爾道南泉前頭爲人後頭爲
人雲門云且道牛內納牛外納直饒道得納
處分明我更問你牛在甚處師拈云一時穿
却

鄧隱峯在襄州破威儀堂只著襯衣於砧槌
邊舉槌云道得即不打于時大衆默然隱峯
便打一下師拈云果然果然

僧問玄沙大耳三藏第三度爲什麼不見國
師玄沙云爾道前來兩度還見麼師拈云敗
也敗也

室中舉古

舉睦州問僧近離甚處僧云河北睦州云河

北有箇趙州和尚曾到麼僧云某甲近離彼中睦州云趙州有何言教示徒僧云每見新到便問曾到此間來麼云曾到趙州云喫茶去忽云不曾到趙州亦云喫茶去睦州云慚愧却問僧趙州意作麼生僧云只是一期方便睦云苦哉趙州被爾將一杓屎潑了也便打睦州却問沙彌爾作麼生沙彌便禮拜睦州亦打其僧往沙彌處問適來和尚打爾作什麼沙彌云若不是我和尚不打某甲師云者僧克由巨耐將一杓屎潑他二員古佛諸上座若能辯得非唯趙睦二州雪屈亦乃翠峯與天下老宿無過若道不得到處潑人卒未了在

起坐具作一圓相磔云我聞有一獵犬甚惡僧云尋羶羊聲來磔云羶羊無聲到汝尋僧云尋羶羊跡來磔云羶羊無跡到汝尋僧云尋羶羊蹤來磔云羶羊無蹤到汝尋僧云恁麼則死羶羊也黃檗便休到來日上堂云獵犬在甚處僧便出來磔云昨日公案未了老僧休去你作麼生僧無語磔云將謂是本分衲子元來是義學沙門以拄杖打出師云只如聲響蹤跡既無獵犬向甚處尋逐莫是絕聲響蹤跡見黃檗麼諸禪德要明陷虎之機也須是本分衲子

舉外道問佛不問有言不問無言世尊良久外道云世尊大慈大悲開我迷雲令我得入師云諸禪德迷雲既開決定見佛還許他同參也無若共相委知則天下宗師並爲外道伴侶如各非印證則東土衲僧不如西天外舉龍牙和尚問翠微如何是祖師西來意翠微云與我過禪板來牙取禪板與翠微接得便打牙云打即任打要且無祖師意後又問臨際如何是祖師西來意際云與我過蒲團來牙取蒲團與臨際接得便打牙云打即任打要且無祖師意師云臨際翠微只解放不解收我當時若作龍牙待伊索蒲團禪板拈得劈曾便擲

舉禪樹問定山不落數量請師道定山提起數珠云是落不落樹云圓珠三竅人人有請師圓前話山便打禪樹便去定山云三十年後槌曾大哭去在禪樹果後開堂示衆道三十年前被定山老子瞞我一上不同小小師云定山用即用爭奈險禪樹知即知要且未曾具擇法眼試請辯看

舉僧問長慶如何是正法眼慶云有願不撒沙保福云不可更撒也師云夫宗師決定以本分相見不敢撒沙且那箇是諸人正眼不受人瞞底漢出來對衆道看共相知委若道不得翠峯一一與爾點過開眼也著合眼也著

舉黃檗有六人新到五人作禮其中一人提

舉趙州問僧曾看法華經麼僧云看來州云

衲衣在空閑假名阿練若誑惑世間人爾作麼生會其僧擬禮拜州云爾披衲衣來麼僧云披來州云莫惑我僧云如何得不惑去州云莫取我語師云大小趙州龍頭蛇尾諸人若能辯得便乃識破趙州如或不明箇箇高擁衲衣莫惑翠峯好

舉長髯問僧甚處來僧云九華控石菴髯云菴主是什麼人僧云馬祖下尊宿髯云名什麼僧云不委他法號髯云他不委爾不委僧云尊宿眼在甚處髯云若是菴主親來今日也須喫棒僧云賴遇和尚放過某甲髯云百年後討箇師僧也難得師云是則二俱作家要且只解收虎尾不能據虎頭若使德山令行並須瓦解

舉保福示衆云此事如擊石火閃電光構得構不得未免喪身失命僧便問未審構得底人還免喪身失命也無保福云適來且致開黎還構得麼僧云若構不得未免大衆笑保福云作家作家僧云是什麼心行福云一杓屎攔面潑不知臭師云諸上座保福有生擒

虎兇底爪牙者僧也不易相敵雖然如此要且放過保福一著只如翠峯與大衆還許諸方檢責也無若免不得平地上死人無數其中得有活底麼師拈起拄杖云來也來也舉歸宗鋤草次見一條蛇以鋤斬之僧見便

問久響歸宗元來是箇麤行沙門宗云爾麤我麤後雪峯問德山古人斬蛇意旨如何德山便打雪峯便走德山召云布衲雪峯迴首德山云他後悟去方知老漢徹底老婆心師云歸宗只解慎初不能護末德山頗能據令且未明斬蛇師召大衆云看翠峯今日斬三五條以拄杖一時打下勸辯

問僧甚處來僧云和尚問誰師云我問爾僧云何不領話師云翠峯今日敗闕寶華侍者來看師師問寶華多少衆侍者云不勞和尚如此師云我好好問爾勸越作什麼侍者云不得放過師云真師子兒喫茶了師把住云適來得恁麼無禮侍者擬議被師一掌云歸去分明舉似寶華

有數人新到至師云新到那僧云是師云來堂去僧便去師復喚來來其僧却迴師云洞庭難得師僧與爾一椀茶喫問僧甚處受業僧云天章師云將得蘭亭記來麼僧云爭敢呈似和尚師云草本不勞拈出

五人新到師云洞庭絕頂無行路不假梯航速道看僧云特來禮拜和尚師云湛水停舟徒誇運濟僧無語師云過者邊來其僧齊過師云將頭不猛悞累三軍參堂去

問僧名什麼云義懷師云何不名懷義僧云當時致得師云誰與汝安著僧云某甲受戒來十年也師云行脚費却多少草鞋僧云和尚莫瞞人好師云我也沒量罪過爾作麼生僧無語師云脫空謾語漢便打

問新到近離甚處僧云興教師云達磨一宗掃土而盡僧無語師云天上天下唯我獨尊復問僧聞黎名什麼僧云宗雅師云雅即不問作麼生是宗僧無對師云且限三日其僧頻來下語師皆不諾僧却問某甲見處只恁

麼和尚作麼生師云爾何不問我僧方擬問
被師連打數下

問新到發足甚處僧拍掌一下師云兩重公
案僧云恰是師便喝僧無語師云還我一拍
來僧擬議師云瞎漢來堂去

六人新到師問參頭夫為上將須是七事隨
身兩刃交鋒作麼生僧云久響翠峯有此一
著師云一著放過還我草鞋錢來僧喝師便
棒僧約住拄杖與師一拍師云未到翠峯與
爾二十棒了也僧無語師云且在一邊却問

第二副將作麼生僧茫然師云一狀領過喫
茶了師把住參頭云適來公案者裏即恁麼
堂中作麼生舉僧擬議師打一坐具推出
雪峯和尚塔銘并序

夫從緣有者始終而成壞非從緣得者歷劫
而常堅堅之則在壞之則捐雖然離散未至
何妨預置者哉所以疊石結室翦木合函般
土積石為龕諸事已備頭南脚北橫山而卧
惟願至時同道者莫違我意知心者不易我
志深囑載囑幸勉勵焉縱饒他日邪造顯揚

豈如當今正眼密弘善思之審思之 師註

兄弟添十字云因無二君同心著一儀云風

直與云土主曰松山云四顧匪卵塔號難提

倚云更有胡家曲云一西一東汝等切

須知云自南自北我唱泥牛吼云開莫舉頭

汝和木馬嘶云見應合眼但看五六月云豈

然云冰片滿長街云事非草薪盡火滅後云

去云密室爛如泥云須到如此

受師號上堂僧問皇恩已降海衆同觀學人

上來願聞舉唱師云好音在耳人皆聽進云

聽後如何師云問著元來總不知僧云學人

到者裏實謂不知師云許爾是箇草賊復云

禪家流還如戰將見聞勇健索不來即便捨

下雖一期之作爭似借水獻華唱太平歌好

夜雨山草滋爽籟生古木閑吟竺仙偈勝於

嚼金玉蟋蟀啼壞墻苟免悲局促道人優曇

華迢迢遠山綠是知道無不在誰云閒然故

天有道以輕清地有道以肅靜谷有道以盈

滿君有道以敷化故我今上皇帝金輪統御

廠澤露流草木禽魚無遠不及巖野抱疾之

士俄承寵光此生他生無以云報賢守司封

高扶堯舜下視龍黃龔千載之雅風鎖萬邦

之春色佇當明詔別振休聲貳車屯田諸廳

朝宰不敢飾辭褒讚仲尼言云吾禱久矣

住明州雪竇禪寺語

師開堂日於法座前顧謂大眾云若論本分

相見不必高陞寶座乃以手指一劃云諸人

隨山僧手看無量諸佛國土一時現前各各

子細觀瞻其或涯際未知不免拖泥帶水即

便陞座僧正宣疏了維那白槌云法筵龍象

衆當觀第一義時有僧出來師乃約住云如

來正法眼藏委在今日放行則瓦礫生光把

定則真金失色權柄在手殺活臨時其有作

者相共證據僧乃問遠離翠峯祖席已屆雪

竇道場未審是一是二師云馬無千里謾追

風進云與麼則雲散家家月也師云龍頭蛇

尾漢問德山臨濟棒喝已彰和尚如何接人

師云放過一著僧擬議師便喝僧云未審只

與麼別有在師云射虎不真徒勞沒羽問布

髮掩泥因底事全身半偈為誰施師云天上

天下唯我獨尊進云若然者立雪豈能傳妙旨三拜伸後始為親師云莫亂統問梵王請佛蓋為羣生學士請師當為何事師云相識滿天下進云與麼則大眾露恩也師云你分上作麼生進云學士證明師云未在有俗士問十方同聚會箇箇學無為此是選佛處心空及第歸如何得及第去師云徒遭點額進云如此則辜負平生也師云教休不肯休問一焚龍闢萬像咸臻未審是何境界師云金殿草漫漫進云向上更有事也無師云白雲千里萬里問吹大法螺擊大法鼓朝宰臨筵如何即是師云清風來未休進云與麼則得遇於師也師云一言已出駟馬難追僧禮拜師云放過一著師又普觀大眾一迴乃云人天普集合發明箇什麼事焉可互分賓主馳騁問答便當宗乘去廣大門風威德自在輝騰今古把定乾坤千聖只言自知五乘莫能建立所以聲前悟旨猶迷顧鑑之端言下知宗尚昧情識之表諸人要知真實相為但以上無攀仰下絕已躬自然常光見前箇箇壁

立千仞還辯明得也無未辯辯取未明明取既辯明得能截生死流同踞祖佛位妙圓超悟正在此時堪報不報之恩以助無為之化師在翠峯受疏日洞庭檀越與明州專使相爭絃紜不已師乃陞座普告大眾不須作閑事在況僧家也無固無必住則孤鶴冷翹松頂去則片雲忽過人間應非彼此殊源動靜乖趣今與諸人評議念三二年洞庭晦迹承四遠信心恩顧棲衆方諧舊轍藏教復乃新歸豈可知感頓忘遠致前邁誠為不可而又四明太守星馳介使輜重俄臨既已跋涉數州迢遞千里投誠苦逼一至於斯進退審詳不能自決敢問大眾住翠峯好往雪竇好子時來僧高聲云往雪竇好師乃顧謂洞庭諸檀越云不用為訝宜各知時且佛法委自王臣兼住持亦以緣斷在彼在此本無間然希披疏文以塞來命便下座師至晚小叅僧問四明侯伯遠降公文未涉程途請師速道師云劉進云鄞江一枝今日獨秀師云不許夜行師乃云諸仁者未有長

行而不住未有長住而不行古之今之各有攸往且如茲院僻處一隅若非念報佛恩無以四來居此恐山僧進發之後法席空虛今命素公開士接續住持幸冀衆慈同心勸請師辭翠峯上堂僧問承學士有言輟翠峯之祖席登雪竇之道場如何是不動尊師云下坡不走快便難逢進云與麼則動若行雲止猶谷神師云你須緊峭草鞋師乃云山僧斯者抑徇彼請難可稽留束裝告行但多攀感況住持久煩勤舊備認歲寒希各務道專致以副誠祝其有參隨諸高士動逾千里俯近百僧忽齋粥踈遺船車隘窄與相回互禪悅自貽則佛國徧遊亦不為遠何以諸禪德去來不以象故無器而不形動靜不以心故無感而不應然則心生於有心象出於有象象非我出故金石流而不焦形非我生故日用而不勤絃紜自彼於我何為請諸人高挂征帆不勝珍重師到萬壽衆請上堂僧問七事隨身便請相見師云打退鼓進云方始交鋒已見大敗師

云虛僧擬議師便喝者般漢有什麼死急問
翠峯一箭已射雪竇雪竇一箭當射何人師
云不為鼯鼠發機進云非但聞名今日親見
師云添得一場愁僧禮拜師云若是便休師
乃云萬壽門下一一作家蓋是強將之兵也
然雖如此保福有言擊石火閃電光構得構
不得未免喪身失命若教據令而行盡蘇臺
一境人箇箇三頭六臂到翠峯手裏也須瓦
解冰消如今放過一著分付萬壽和尚
師到秀州百萬道者備茶筵請陞堂僧問赴
請雪竇先至嘉禾向上宗乘請師舉唱師云
鳥啼處處皆相似進云與麼則得聞於未聞
也師云不是苦心人不知僧擬進語師便喝
僧禮拜師云別有問話者出來問如何是教
外別傳一句師云三生六十劫進云學人未
會師云碧眼胡僧笑點頭師乃云山僧此者
承鄞江太守之命俾赴雪竇住持再至嘉禾
彌增嘉幸仍承百萬道者曲賜周勤仰荷之
懷無以忘也兼勞廣命碩德抑令舉唱宗乘
况達士相逢非存目擊若云言中有響句某

呈機猶曲為中下之流向本分衲僧遠之遠
矣祇如適來僧問教外別傳一句對云三生
六十劫諸人還知落處也無且鷲池鷲嶺海
甸菴園三百法會之中甚處有者箇消息所
以道三世諸佛不能自宣一代時教詮注不
及除非知有莫能知之十一久立眾慈伏惟珍重
師到靈隱眾請陞座僧問遠別翠峯文室將
屆雪竇道場如何是不動尊師云看風使帆
進云恁麼則觀方知彼去去者不至方師云
龍頭蛇尾問如何是祖師西來意師云點進
云猶有者箇在師云三十年後進云與麼則
翠峯今日瓦解冰消師云有些子師乃云莫
是與上座相爭然則論戰也箇箇力在箭鋒
相拄又須是箇特達漢始得若意根尚滯直
須向前決擇所以長沙和尚道百尺竿頭坐
底人雖然得入未為真百尺竿頭須進步十
方世界是全身僧舉問南泉百尺竿頭如何
進步泉云更進一步僧復問瓦官官云百尺
竿頭用進作什麼僧不肯官便打師云大眾
古人機變出在一時其間別有商量亦未言

若且如雪竇今日再入靈隱也似百尺竿頭
依南泉之言得進一步喜與大眾相見則十
方世界一時周而便下座
師到越州承天寺眾請陞座僧問學人不問
西來意藏身北斗意如何師云拈頭作尾漢
進云請師答話師云西天令嚴問有問有答
實主歷然無問無答時如何師云古路草漫
漫進云若不上來焉知與麼師云利劍不斬
死漢師乃云作者相見一撈一捺擦起便行
若佇思停機卒摸捺不著若言問在答處答
在問宗箇箇依草附木問不在答處答不在
問宗罕見頂上有眼諸人還薦得也無薦得
薦不得並是新雪竇之過且莫鈍致承天和
尚
越州檀越備茶筵請師陞座僧問檀越殷勤
伸三請乞師方便指迷津師云不許夜行投
明須到進云非但學人四眾有賴師云百千
年後問如何是祖師西來意師云迢迢十萬
餘僧禮拜師云拄杖不在師乃云諸檀信山
僧暫以經過邂逅相遇何沐特隆異待抑俾

敷揚且如承天和尚寅暮流慈諸人況是異聞已絕希冀何必更煩雪竇重爲發宣直饒三世聖人六代關士利生間出故不敢錯誤諸人絲毫然雖與麼放過即不可良久云不解作客勞煩主人

師歸寺上堂有僧問如何是雪竇正主師云何不問雪竇山中人進云與麼則把定乾坤去也師云出門唯恐不先到當路有誰長待來問如何是古佛家風師云青天白日進云還許學人領會也無師云不是劍客請莫相過問如何是第一句師云袖裏金槌僧便喝師云朝三千暮八百問如何是雪竇境師云天無四壁進云如何是境中人師云月在中華進云與麼則從苗耕地因語識人師云是僧禮拜師云酌海持蠡一場困苦師乃云甚生標格還知也無諸禪德祖佛不能宣傳天地不能覆載二乘聞之膽裂十地到此意驚其或達士切磋頗逢決戰一撥一捺略露風規句滯則嶽立磨空源迷則雲橫布野所以先聖道一言繞舉千車同轍該括微塵猶是

化門之說你衲僧合作麼生觀自知時便下座

上堂僧問承師有言三更過鐵門意旨如何師云忠言不避截舌僧禮拜師云臨筌方覺取魚難問千山萬水穿雲去撥草瞻風事若何師云蹋破草鞋進云爲什麼如此師云人無遠慮必有近憂問如何是向去底人師云伊蘭樹下坐進云却來時如何師云白日繞須彌進云天上天下唯我獨尊師云二頭三手漢問承師有言釋迦老子出氣不得甚處請說師云君子千里同風進云與麼則殃及子孫也師云素非鴨類師乃云諸禪德直饒文殊辯說認螢火爲太陽居士杜詞指魚目同明月所以雪竇尋常道威音王已前無師自悟是第二句還我第一句來若未能把定要津不免奔馳南北

亦猶以智遣惑頗逢下士以智遣智罕遇作家要會兩不平麼諸人也沒量罪過雪竇也沒量罪過雪竇過自能檢責你者漆桶不打更待幾時以拄杖一時趁下

冬至上堂僧問鼓聲纔罷海衆齊臻新節一句請師垂示師云三日前五日後進云與麼則聞於未聞師云索短不構深泉問文殊仗劍其意如何師云八十老僧閑灌頂進云學人不曾師云四溟無浪月輪孤僧良久師喝云甚處去也僧禮拜師云放過一著師乃云相逢不拈出舉意便知有早是不啣啣漢更亂躡步向前實謂苦屈諸禪德看他允覺未離兜率已降閻浮未出母胎度人已訖若言周行七步目顧四方天地之間唯我獨尊尚有人不放伊過如今巧說異端不肯荷負真可哀愍所以道天魔外道是辜恩德漢聲聞二乘是自欺誑人你見如此不平之事便合憤悻驅將去喝將去隨例道我不知不會者般底苦海裏有什麼出頭時

上堂云形與未質名起未名形名既兆遊氣

亂清師拈起拄杖云大衆拄杖子是形名雙
舉還有過也無有即水裏月無即形名兆若
也究得實謂恩大難酬

上堂云未出母胎見成公案周行七步過犯
彌天更入鹿野苑中枝蔓上復生枝蔓乃拈

起拄杖云叫叫便下座

上堂僧問如何是觸目菩提師云風動塵起

鳥飛落毛進云乞師再垂方便師云泊被打

破蔡州問如何是教外別傳一句師云好問

進云還許學人領會也無師云有頭無尾漢

師乃云諸仁者夫宗師唱道譬若滄溟上客

獨泛蘭舟月渚煙波隨情放曠欲拋香餌須

待長鯨縱有織鱗應無希冀

上堂云一徑直二周遮衲子辯得眼裏生華

便下座

上堂僧問達磨西來單傳心印諸方爲什麼

各說異端師云誰進云爭奈即今何師云西

天令嚴進云與麼則入水見長人師云韓信

臨朝底問三通鼓罷羣賢集請師拋下御前

題師云長因送人處憶得別家時進云與麼

則退身三步師云依舊漁翁把釣竿問不除

妄想不求真底是什麼人師云一宿覺進云

與麼則天上天下唯我獨尊師云一撥便轉

師乃云大凡出衆切磋也須是本分禪客若

未具啐啄同時眼卒摸捺不著

上堂衆方集定師云不用低頭思量難得便

下座

上堂云直釣釣鯤鯨曲釣釣龜鼈曲釣若在

鯤鯨理應未可直釣若在龜鼈情亦不甘如

今拋釣也負命者上釣來良久云勞而無功

便下座

上堂衆集定師起立云雪竇得與麼長請人

得與麼短若人道得齊肩句許伊把定乾坤

便下座

上堂云久雨不晴衲僧向甚處曬眼皮草便

下座

上堂云布袋裏盛錐子不出頭是好手復云

大衆雪竇錐頭出也莫有傍不肯底禪客出

來良久云諸人既乃縮頭且聽諸方檢責

明覺禪師語錄卷第一

明覺禪師語錄卷第一

校勘記

一 底本，明永樂北藏本。

一 八五〇頁上二行「參學小師惟蓋

竺編」，南作「僧錄司右闡教兼靈

谷禪寺住持淨戒重校」。

一 八五〇頁上二行與三行之間，南

有「雪竇明覺禪師諱重顯遂州李

氏子初參智門問不起一念云何有

過門召師近前來師繞近前門以拂

子薰口打師擬開口門又打師豁然

開悟」五十六字。

一 八五〇頁上三行末字「語」，南無。

一 八五〇頁上四行首字「師」，南無。

一 八五〇頁上一九行「杭州」，南作

「杭」。

一 八五一頁上一行「上堂問答罷」，

南無。

一 八五一頁中一九行「恁麼」，徑作

「甚麼」。

一 八五二頁上一五行「上堂問答罷」，

〔南〕作「師」。

一 八五三頁下一一行第七字「你」，〔南〕作「爾」。

一 八五六頁上一四行「并序」，〔南〕作「并序師註」。

一 八五六頁中一行「師註」，〔南〕無。

一 八五六頁下五行首字至一九行第

一五字「住……羽」，〔南〕無。

一 八五七頁上一一行第五字至本頁中三行末字「問……化」，〔南〕無。

一 八五八頁上六行「然雖」，〔徑〕作「雖然」。

一 八六〇頁上七行「上堂僧」，〔南〕無。

一 八六〇頁上一〇行第一六字「尾」，〔徑〕無。

明覺禪師語錄卷第二

綺四

門人 一 軫 等 編

舉古

舉僧問趙州道人相見時如何州云呈漆器
師云諸禪德還有識趙州底麼出來相共商
量若未能辯明大好從頭舉與你點破四九
三十六收

舉臨濟示衆云有一無位真人常在汝等面
門出入初心未證據者看看時有僧問如何
是無位真人臨濟下禪牀擒住者僧擬議濟
托開云無位真人是什麼乾屎橛雪峯聞云
臨濟大似箇白拈賊師云夫善竊者神鬼莫
知既被雪峯覷破臨濟不是好手復召大衆
雪竇今日換你諸人眼睛了也你若不信各
歸寮舍自摸捺看

舉僧侍立保福次福云你得與麼麤心福拈
一塊土與僧你拋向門外著僧拋了却來云
甚處是某甲麤心福云我見你築著碓著所
以道你麤心師云然則者僧被保福熱瞞爭
奈真不掩偽曲不藏直雪竇將今視古於理

不甘是你者一隊漢忽僧堂裏來寮舍內出
築著碓著亦乃不知近來麤心轉盛我若放
過便見諸方檢責師驀拈拄杖下座大衆一
時走散

舉雪峯敲觀和尚門觀云誰峯云鳳凰兒觀
云作什麼峯云鷗老觀觀便開門雪峯方入
被觀把住云道道峯擬議被觀推出峯住後
示衆云我當時若入得老觀門你者一隊漢
酒糟漢向甚處摸捺有老宿云雪峯徒有此
語當時入不得如今也入不得師云者辜恩
負德漢有什麼交涉當時入不得豈是教你
入今既摸捺不著累他雪峯俱在老觀門下
舉臨濟侍立德山山云今日因際云者老漢
竊語作什麼山便打際揪倒繩牀山便休師
云二員作者具啐啄同時眼有啐啄同時用
雪竇擬向猛虎口中奪鹿饑鷹爪下分兔敢
謂臨濟德山二俱瞎漢有人辯得天下橫行
舉乾峯和尚云舉一不得舉二放過一著落
在第二雲門出衆云昨日有人從天台來却
往南嶽去峯下座云大衆來日不要普請師

云看他作者吐露箇消息宛爾不同若是瞋
睡漢遞相鈍致乃拈起拄杖云放過一著便
下座

舉玄沙云吾有正法眼藏付囑摩訶大迦葉
猶如話月曹谿豎拂猶如指月鼓山云月咏
玄沙云者阿師就我覓月鼓山不肯却歸衆
云道我就他覓月師云玄沙鼓山如排百萬
軍大陣只拋瓦子相擊或有衲僧辯得當知
正法眼藏付囑有在

舉長慶云淨潔打疊了也却近前就我覓我
劈脊與你一棒有一棒到你你須生慚愧無
一棒到你你又向什麼處會師云雪竇即不
然淨潔打疊了也直須近前我劈脊與你一
棒有一棒到你你即受屈無一棒到你與你
平出但與麼會

勤辯

一日侍者報有三人新到從瑞巖來師云教
伊大展坐具禮拜著其僧方入門師驀拈起
拄杖僧云某甲特來禮拜和尚師云咩咩那
箇是參頭一僧近前問訊師云你爲什麼失

却本道公驗僧云深領和尚慈悲師云過者
邊立復問第二人求朋須勝已似我不如無
師以拄杖指衆頭云你爲什麼隨者漆桶僧
云某甲新戒師亦約云過者邊立又問第三
人適來兩箇敗闕了也你堪作箇什麼僧擬
議師便喝云過者邊乃云據合一時埋却且
念遠來衆堂去

問新到尋師訪道既水遊山僧云謝和尚顧
問師便喝鼻孔裏祇對我僧無對師云苦殺
人來來曾到雪竇麼僧云不曾到師打一棒
云他後不得諱却

一日二人新到師云座主衲僧云請和尚
鑑師云一不成二不是僧云不勞如此師云
我且放過朝到西天暮歸東土作麼生僧無
對師云杜衲僧衆堂去

問新到近離甚處僧云和尚道什麼師云我
問你近離甚處僧退身立師云克由巨耐不
言來處將拄杖來僧云某甲近離奉川師云
打野樵漢何不早與麼道復問第二人你也
一處來僧云某甲近離大梅師云兩段不同

好與三十棒且放過

一日宗首座到方擬人事師約住云既知信
之韜略便須拱手歸降宗云今日敗闕師云
劔刃未施賊身已露宗云氣急殺人師云敗
將不斬宗云是師云禮拜者宗云三十年後
有人舉在師云已放你過

問聰道者久衆事作麼生道者云青天白日
師云亂走作什麼者便喝師云喫棒者擬舉
手師打一坐具云你看者瞎漢亂與

一日五人新到師云你總不消行脚僧擬議
師云一狀領過

有良周上座到師作瞌睡勢僧云新到相看
師不應僧又云新到相看師高聲云阿誰僧
云新到師云已知衆堂去僧云某甲是大龍
受業師喝云漆桶誰識你僧便近前人事師

云好好禮拜著相看了師云還識宗首座麼
僧云是師兄師云你爲什麼鈍致他僧云和
尚休得也師云踏破草鞋漢不能打得你且
坐喫茶

問僧近離甚處僧云天台師云還見智者麼

僧云見師云爲什麼在我脚底僧無語師云
脫空妄語

問僧近離甚處僧云温州師云還識永嘉大
師麼僧云是鄉人師云與你隔海僧云酌然
師云面赤不如語直僧無對師云噓

師在大龍爲知客李殿院到山茶話次問師
知客是長老鄉人師云不敢院云且在者裏
不得亂走師云本爲行脚院云行脚爲甚事
師云看亂走底院微笑

師在池州景德爲首座時太守曾學士入院
相訪茶果次學士拈箇棗子拋在地上召師
首座師應諾士云古人道不離當處常湛然
在那裏師指景德長老云只者老子也不知
落處士云首座知也不得無過師云明眼人
難瞞

師到太湖有余巡檢請師并志依上座齋臨
起檢問卑官今日命二衲僧齋得何果報師
云圖他一粒米失却半年糧依云臨行方覺
主人寬師召舍人舍人擡頭師指依云槩根
衲子齋他有甚益巡檢大笑師便起去

師赴雪竇經過杭州徐轉運問師雪竇名山多有具眼底衲僧忽相靠來長老作麼生支遣他師高聲召客司司近前師云運使問箇什麼使云推過來師云推過又爭得使無語師云彼此沒便宜使又問長老幾日渡錢塘江師云山僧未敢前去使云作箇什麼師云徐轉運把斷要津使云今日被長老揉我一上師便辭退

師在南嶽福嚴爲藏主李殿院同雅長老入藏院師出接殿院云藏主那師云不敢院云藏中說著下官麼師云目前可驗院云驗底事作麼生師云不消一劄院無語師云且請殿院歸寮喫茶坐次山嵐忽起雅云殿院遊山恰阻煙霧院云靈峯聖跡爲什麼却有者箇師云下方無院擬道雅云藏主壯觀福嚴師云和尚且莫開眼院云作家作家師云殿院尊重時有道士秀才到院又問三教中那教最尊師乃起側身而立院云有口何不道師云對夫子難言院云休休便起師云適來造次

師在舒州海會時因看胥通判問山中多少衆師云一百來僧胥云既是海會爲甚只有百僧師云人貧智短胥云更道師云他後有人舉在又問山中長老每日說箇什麼師云路逢劍客胥云咩師便辭退

師在明州看曾學士坐次士問曾與清長老商量趙州勘破婆子話端的有勘破處麼師云清長老道箇甚麼士云又與麼去也師云清長老且放過一著學士還知天下衲僧出者婆子纏續不得麼士云者裏別有箇道處趙州若不勘破婆子一生受屈師云勘破了也

師與僧衆入城緣化學士先有公文止絕僧道投刺師亦同例乃有頌寄士云碧落煙凝雪乍晴住山情緒寄重城使君道在未相見空懸甘棠影裏行學士回答云勞勞世務逐浮沈一性澄明亘古今目擊道存無阻隔何須見面始知心復令人請師相見了士云道存無阻因甚入來不得師云他後見別處長老學士不請舉向伊士云舉著又何妨師云

山僧罪過士云好好師云諾諾

學士解印後師送到越州住數日乃辭士堅留師云歸山住持不忘學士此日士云衲僧家愛把不定師云爭得到者裏士無語師云已沐學士放辭士云容出城相送師便退士至客亭排果子茶湯了師問學士自此一別甚處再得相見士云長老何以對面忘却師云微僧心亦足矣時廣慧和尚復問師自此一別甚處與學士再得相見師云直是千里萬里於是取別士云善爲道路師云諾諾

詩頌

贈天衣長老

天衣長老無價之寶金烏東昇是何杲杲他年或要兒孫無端須入荒草

寄妙果政長老

有叟機宜太孤絕冷澹情懷止金鐵游歷不知參訪誰曾道天無第二月近聞鎖斷奔馳問何物拈來固其本飛騰直上三十三見不見爲君困中巖藏晦亦枯槁年光休競七十九南北東西追古風時有其人繼其後

送宗侍者

深憶韶陽示奇句，古人到此猶不住。宗禪九萬曾列程，吾想七閩還獨步。重巖忽爾來扣門，自謂孤蹤若斷雲。雪庭乍遠雖多恨，且有中峯月共分。斯句乃宗禪者，離山日有作。如斯慷慨非希冀，浩浩清風無處避。天上天下知不知，五葉千燈復何啻。

小谿贈溥禪者

歲月將闌天光普，寒鄙叟復枕盤桓。且難萬杉禪客來尋我，言意勤勉清墮拂曙片帆。重率歸百節四肢難，負荷風之泠泠潮之平。平強寫離辭，幾不成巖層落落舊知己，相見無忘極此情。

送清禪者

有禪者兮曠發靈機，出洪都兮聲先步隨。一文一技不為用，方內方外誰論之。春風來兮何所別，何曾拂盡古巖雪。極目寥寥思遠人，曹谿堪共此時節。清兮清，苦宜存歷亮兮辜馬休同跡。彈指凋殘六葉華，西山一去斷消息。

送一禪者

天得一地得一，玉得一兮無等匹。谷得一兮歸巨溟，應見三山皆岌岌。一得一又何必今古，不曾居丈室。千華影裏復是誰，八面風清照紅日。一禪一禪，須記取象骨齡難。兮且相許，負石投針忽載來。拂袖雙雙便回去。

送全禪者

有龍彪兮時之相宜，有藝行兮人之所歸。東西武步兮復誰是我，上下觀方兮存機未機。全禪全禪，知不知大施門開。兮塵區可依送靜山水。

寄藏主收禪者

松根石上曾唯我，四顧寥寥誰未可。豈知白鳳傳好音，拋却亂雲千萬朵。谿山重疊春將暮，風遞殘華柳飛絮。金盃待月應有期，寶冠照水寧無據。靜禪復記吾深囑，彼兮國士真烈宿。相見從容莫等閑，人天景行存高躅。

新州出箇賣樵者

龍翔年中藏晝夜，黃梅春得古菱華。不倚物兮便高挂，秀禪拂拭無塵埃。歷盡諸難眼未開，交馳石上求文字。爭得

孤峯却載來，近還有箇尋吾祖。云在盧村深處住，偷得隣家些子光。用作千燈擬流布，呵呵呵地久天長。爭奈何

送雲禪德

中巖老兮八十一，閑寄十年助辭筆。縱誇步驟當此時，豈免龍鍾笑他日。他時誰也流機變，午夜寒蟾生水面。別有清光何處來，舉目亂飛星斗轉。歌兮歌兮，苦搜索遠贈雲禪。愧標格黃梅席上，追古風高唱自知天地窄。贈陸學士

古之陸大夫

多集遊方輩，今之陸使君。復與空生會，大國正搜羅。長劔今磨淬，或問清曠閑不知若為對。

舟行

孤舟選勝傍江干，乘興幽游思未闌。向日望來春色晚，順潮歸去野情寬。高歌釣客收綸線，弄影沙禽刷羽翰。迴想古祠無限意，海蟾初上逼人寒。

東軒偶作

叢竹小山些子境，偶來閑坐解疎慵。怡然縱

目誰知我勝入摩雲千萬峯

明覺禪師後錄

上堂云日日東上日日西沒循環三百六十幾箇解知窠窟放開精精冥冥把定恍惚惚君不見毗耶離城彼上人一室寥寥

是何物師召大眾云高著眼便下座

上堂云黃金爲地白銀爲壁釋迦老子不合向者裏肩師以拄杖撥一下云看看落爾諸人頭上

上堂云三千劍客今何在獨許莊周致太平

便下座

一日云大眾者一片田地分付來多時也爾諸人四至界畔猶未識在若要中心一樹子我也不惜良久云放憨作麼便下座

因雪示衆云頭上皚皚脚下皚皚金色尊者十一獨上高臺開眼造罪合眼受災如何如何天網恢恢

上堂衆方集定師云勘破了也便下座

上堂拈起拄杖云物中眼中物十方如來同此超出還會麼瞎漢歸堂

上堂云龍泉與刀斧同鐵利銚懸殊驚駭與驢馬同途遲速有異酌然酌然一出入半合半開平展之流試辯緇素

上堂云直得動地雨華何如歸堂向大便下座

師一日晚參於僧堂前立云不打鼓上去不得把却門入來不得速道速道大眾眼目定動師以拄杖一時打趣

上堂舉雲門大師云禪河隨浪靜山河大地不是浪師拈起拄杖云看看一處起千處百

處沒背一處息千處百處不識還會麼歸堂上堂云見一則瞎汝眼知一則翳汝眼翳生

則天上人間瞎却則三頭六臂或若辯得許爾十字縱橫

上堂云以字不成八字不是優曇華正開艱著無香氣翻笑釣魚船上客不愛南山愛籠鼻僧問萬里無雲伸一問青天喫棒意如何

師云軍隨印轉僧云恁麼則在和尚手裏師云利劍不斬死漢

上堂云春山疊亂青春水漾虛碧寥寥天地

間獨立望何極便下座却顧謂侍者云適來有人看方丈麼云有師云作賊人心虛

上堂云大無外小無內半合半開成團成塊老胡既隔絕衲子多違背從他千古萬古長漫漫填溝塞壑沒人會以拄杖卓地一下云歸堂十二

一日上堂衆方集以拄杖橫按膝上云恁麼會得瞎却天下人眼復拋下拄杖云救取一半便下座

上堂云十方無壁落四面亦無門淨裸裸赤俊俊沒可把灌溪老出頭不得且致我騎牛入爾鼻孔裏一般漢聞人恁麼道若風過樹頭有什麼共語處

上堂云一不定二不可上下四維春風包裹桃華杏華闌開柳條桑條慙破可憐昔日靈雲剛道迷達達磨師拈起拄杖云靈雲鼻孔穿了也

上堂云垂絲千尺意在深潭離鈎三寸釣得一箇是好手良久云負命者上鈎來

一日小參示衆云須菩提巖中宴坐諸天雨

華讚尊者云空中雨華讚歡復是何人云
我是梵天尊者云汝云何讚歡天云我重尊
者善說般若波羅蜜多尊者云我於般若未
曾說一字汝云何讚歡天云尊者無說我乃
無聞無說無聞是真說般若波羅蜜多又復
動地雨華師云避喧求靜處世未有其方他
在巖中冥坐也被者一隊漢塗糊伊更有者
老把不住問云空中雨華讚歡復是何人早
見敗闕了也我重尊者善說般若波羅蜜多
惡水驀頭潑我於般若未曾說一字草裏走
尊者無說我乃無聞識甚麼好惡總似者般
底何處有今日師復召大眾雪竇幸是無事
人爾來者裏覓箇甚麼以拄杖一時趨下
上堂舉僧問趙州至道無難唯嫌揀擇是時
人窠窟否州云曾有人問我直得五年分疎
不下師云識語不能轉死却了也好與二十
棒者棒須有分付處爾若辯不出且放此話
大行
示衆云春力不到處枯樹亦生華九年人不
識幾度過流沙便下座

有時云馬祖陞堂百丈捲席正令不從拗曲
爲直

上堂云似地擎山不知山之孤峻如石含玉
不知玉之無瑕晝行三千夜行八百是我尋
常用底拈放一邊爾諸人向甚處見盤山速
道速道

上堂舉僧問趙州二龍爭珠誰是得者州云
老僧只管看師云看即不無爭即不得且道
扶者僧扶趙州

上堂云不是金色頭陀有理也無雪處便下
座

一日示衆云城東老母與佛同時而生一世
共處而不欲見佛每見佛來即便迴避周迴
上下皆避不及乃以手掩面十指掌中悉皆
見佛諸上座他雖是箇老婆死有丈夫之作
既知迴避稍難不免吞聲飲氣如今不欲見
佛即許爾切忌以手掩面何以明眼底觀著
將謂雪竇門下教爾學老婆禪

舉黃檗入堂於南泉位中坐泉問長老甚年
中行道檗云威音王已前泉云猶是王老師

兒孫下去檗便起去師云可惜王老師只見
錐頭利我當時若作南泉待伊道威音王已
前即便於第二位坐令黃檗一生起不得雖
然如此也須救取南泉

舉藥山久不上堂知事白云大眾久思和尚
示誨山云教槌鍾著大眾方集山便掩却門
知事咨白既許爲大眾上堂爲什麼一言不
施山云經有經師論有論師爭怪得老僧師
云可惜藥山老漢平地上喫撲盡大地人扶
不起

舉石磬曾爲獵人趁一鹿從馬大師菴前過
問云還見我鹿麼大師云爾是甚人輩云我
是獵人馬云爾還解射也無云解射馬云一
箭射幾箇云一箭射一箇馬云爾不解射豈
云和尚莫解射否云我解射輩云和尚一箭
射幾箇馬云我一箭射一羣輩云彼此生命
何用射他馬云爾既知如何不自射輩云若
教某甲自射直是無下手處馬云者漢無明
煩惱頓歇輩於是刀斷其髮在菴給侍師
云馬大師一箭射一羣信彩射得有甚用處

不如他石鞏一箭射一箇却是好手雪竇今日効古人之作擬放一箭高聲喝云看箭復云中也便下座

舉同光帝命諸禪師坐次云朕收得中原之寶只是無人酬價與化云如何是陛下中原之寶帝以兩手展幙頭脚化云君王之寶誰敢酬價師云至尊所得只可傍觀若非與化作家往往高價酬却

一日上堂良久云大施門開無擁塞忽然有箇衲子出來雪竇倒退八百何以臨危不悚人便下座

舉保壽問胡釘鉸云莫便是胡釘鉸云不敢壽云還釘得虛空麼云請和尚打破將來壽便打鉸云莫錯打某甲壽云向後遇多口阿師與爾點破去在後至趙州舉前話問云不知某甲過在甚處趙州云只者一縫尚不奈何胡釘鉸於此有省師云雪竇要打者三箇漢第一趙州不合瞎却胡釘鉸眼第二保壽不能塞斷趙州口第三胡釘鉸放過保壽師驀拈起拄杖云更有一箇大眾一時走退師

擊繩牀一下便起去
上堂善財別後誰相訪樓閣門開竟日閑便下座

舉肅宗帝問國師百年後所須何物國師云與老僧作箇無縫塔子帝曰請師塔樣國師良久云會麼帝云不會國師云吾有付法弟子就源却請此事請詔問之國師遷化後帝詔就源問此意如何源云湘之南潭之北中有黃金充一國無影樹下合同船瑠璃殿上無知識師云肅宗不會且致就源還會麼只消箇請師塔樣盡西天此土諸位祖師遭者一撈不免將南作北有傍不肯底出來我要問爾那箇是無縫塔

舉雲門與長慶在雪峯日因舉石鞏見僧便云看箭三平到遂擊開曾鞏云三十年一張弓兩下箭只射得半箇聖人雲門問長慶作麼生道免得石鞏喚作半箇聖人慶云若不還價爭辯真偽雲門云入水始知有長人師云石鞏要先拗折不難爭奈三平中的了也然則老宿要活三平且未免張弓架箭

上堂云一華開天下春古佛爲什麼不着便爾若透得救取天下老宿忽若有箇衲僧出來云和尚且自救也許伊是金毛獅子

舉舍利弗問須菩提夢中說六波羅蜜與覺時同別須菩提云此義幽深吾不能說此會有彌勒大士汝往彼問師云當時若不放過隨後與一劄誰名彌勒誰是彌勒者便見冰消瓦解

舉傅大士云要知佛去處師云三生六十劫末後一句天下衲僧跳不出直饒口挂壁上漢別有一竅勘過了打

舉紫湖和尚山門立一牌牌上有字云紫湖有狗上取人頭中取人腰下取人脚擬議則喪身失命時見新到便喝看狗僧纔回首湖便歸方丈師云衆中總道者僧著一口著即著了也爭奈者僧在敢問諸人紫湖狗著者便死因甚麼者僧猶在若無知方眼救得者僧設使紫湖出世咬殺百萬箇有甚益我當時若見先斫下牌然後入院待者老漢喝云看狗與伊放出箇焦尾大蟲如今諸人要

見麼日勢稍晚歸堂

上堂云國無定亂之劍四海晏清也不是分外還有梯山入貢底麼

因中山主為師煎茶師問僧爾隨例喫茶將何報答僧云因風吹火師不肯自代云難為

和尚復云還會麼僧云不會師云爾也須煎一會茶始得

舉長慶示衆云撞著道伴交肩過一生參學事畢師云是即是針不割風不入有其麼用處

上堂云摩竭掩室計校未成毗耶杜辭伎倆俱盡還有人點檢得者兩箇老漢出頭不得處麼直饒覷透更有箇漢礙著以拄杖擊繩牀一下便下座

有時云槌擊妙喜世界百雜碎底人為甚麼處處解持鉢廿四

又云知時頻到香積國底人為甚麼拄杖頭上失却眼

一日云義出豐年儉生不孝於佛法中作麼生辯損益便下座

上堂云一塵一佛國一葉一釋迦德山何以卓牌於鬧市又云入林不動草入水不動波投子因甚麼脚下五色索透關底試辯看

上堂云世事悠悠不如山丘卧藤蘿下塊石枕頭者般底有其用處喚起了打

有時云一切不是句瞎却時人眼還有出得底麼

上堂云一切法皆是佛法瞞瞞頂頂非為正

觀一切法即非一切法莽莽鹵鹵還同天鼓賞箇名安箇是立箇非向甚處見釋迦老子

還會麼以拄杖卓地一下云各請歸堂示衆云父子親其居尊卑異其位於衲僧分

上是放開是捏聚或若辯得分半院與爾一日云寶山到也須開眼勿使茫茫空手廻便下座

上堂云機輪轉處作者猶迷千眼頓開與君相見廿九

師問新到關黎甚處人僧提起坐具師云蝦跳不出斗僧云踣跳師便打僧云更踣跳師又打僧便走師喚迴僧便禮拜云觸忤和尚

師云我要者話行爾又走作什麼僧云已徧天下了也師復打五下僧云有諸方在師云爾只管喫棒師喚第二人近前來甚處人云鼎州人師云敗也僧云青天白日師云兩重公案僧云恰是師以拄杖指云爾擬踣跳僧擬議師亦打五下參頭云者僧喫棒與某甲不同師一時喚近前其僧珍重便走師隨後與一拄杖

上堂云孟嘗之門劍客何在良久云點即到便下座

上堂云泡幻同無礙拈起拄杖云泡幻何處得來又擊一下云西天四七聖東土二三祖鼻孔眼睛總穿在者裏瞋睡漢歸堂

上堂云目前無法意在目前不是目前法非耳目之所到師拈起拄杖云夾山老子甚處

去也何不出來百草頭與大眾相見又卓地一下云在者裏復云咄者野狐精縮頭去便下座

僧問牛頭未見四祖時如何師云恰滑麼僧云見後如何師云三生六十劫僧禮拜師長

吁一聲

上堂云一舉不載說作麼生舉得作麼生會上堂云久雨不晴今日晴袖僧曬了也未良久自云曬了也師云收復拈起拄杖大眾定動師云無一箇靈利便下座打趂

示衆云譬若二龍爭珠有爪牙者不得或有袖僧問既是有爪牙者爲什麼不得請大眾爲雪竇下一轉語

上堂僧問承和尚有言道士倒騎牛意旨如何師云泥人眼赤僧云不會師云有甚麼了期便下座

上堂云天得一以清地得一以寧袖僧得一無風浪起爾若辯得禍不入慎家之門

舉僧問鏡清學人啐請師咏清云還得活也無學云若不活遭人怪笑清云也是草裏漢

師云袖僧有此奇特事若一人半箇互相平展古聖也不虛出來一迴問承和尚有言金剛鑄鐵券意旨如何師云三頭六臂云學人不會師云擡上擡下師拈起拄杖云人天交接兩得相見太茫茫何擾擾穿來且放一邊

三十三二十八敲落又在一處復云退後退後便起去

問承古有言九九八十一意旨如何師云金剛合掌進云學人不會師云故依佛法僧上堂云應緣而化物方便呼爲智拈起拄杖

喚作什麼爾若道不得也許具一隻眼

上堂舉雪峯示衆云盡乾坤是箇解脫門把手拽不肯入一僧云和尚怪某甲不得一僧云用入作什麼師云三箇中有一人受救在忽若總不辯明平地上有甚數便下座

一日云此大講堂洞開東方日輪昇天則有明曜中夜黑月雲霧晦暝則復昏暗戶牖之隙則復見通牆宇之間則復觀壅分別之處則復見緣頑虛之中徧是空性鬱焯之象則紆昏塵澄霽歛氛又觀清淨慚愧釋迦老子說甚還與不還文殊堂裏萬菩薩到處覓不得元來總在者裏靈利漢一見便請拗折拄杖

上堂舉鏡清問僧近離甚處云石橋清云本分事作麼生云某甲近離石橋清云我不管

爾石橋本分事作麼生云和尚何不領話清便打僧云某甲話在清云爾但喫棒我要話行師云然則倚勢欺人奈緣事不孤起者僧若能慎初護末棒則須是鏡清自喫

舉雲門大師示衆云爾若不相當且覓箇入頭處微塵諸佛在爾舌頭上三藏聖教在爾脚跟底不如悟去好還有人悟得麼出來對衆道看師拈云然則養子之緣爭奈屢食爲賤其間忽有不甘底出掀倒繩牀豈不是大丈夫漢然雖如此且問據箇甚麼師蓋拈起拄杖云洎合停囚長智擊繩牀一下便下座上堂云窮諸玄辯若一毫致於太虛竭世樞機似一滴投於巨壑不如歇去好還會麼客亭不遠

上堂云青蘿竇緣直上寒松之頂白雲淡泞出沒太虛之中師拈起拄杖云國師眼睛在者裏瞌睡漢七穿八穴甚處得來

一日舉乾峯示衆云舉一不得舉二放過一著落在第二雲門大師出衆云昨日有人從天台來却往南嶽去峯云來日不要普請師

云諸禪德雲門老漢只解一手擡不能一手
搦還有共相著力底麼試露爪牙看

上堂云不得春風華不開華開又被風吹落
爾若明得褒貶句未必善因而招惡果歸堂
一日云古人道其爲也形其寂也冥轉變天

地自在縱橫河沙而用混沌而榮誰聞不喜
誰聞不驚如何以無價之寶隱在陰入之坑
師以拄杖擊一下云打破了也寶在甚處
有時云不犯之令大衆必合依行

上堂云萬法本閑而人自鬧國師走入露柱
裏去也見麼見麼良久云出頭便死歸堂
示衆云迴而更相涉拈起拄杖云頭上是天
脚下是地眼前綠水背靠青山衲僧道我會
也忽若騎驢入爾鼻孔裏牽牛入爾眼睛中
又作麼生商量

上堂云欲得現前莫存順逆者裏廿三參見祖師
了更買草鞋行脚三千里外也被雪實穿却
鼻孔

一日舉馬祖上堂衆方集百丈出捲席祖便
下座諸方皆謂奇特滑麼舉還當麼若當譬

若水母以蝦爲目若不當又空讚歎箇什

麼衆中一般漢亂踏向前問古人意旨如何
更有老底不識好惡對云將謂仙陀客又云
來日更到座前苦哉苦哉如此自稱宗匠欲
開人天眼目驢年去諸上座雪實當時若見

伊出來捲席劈曾與一踏令坐者倒者俱起
不得且要後人別有生涯去免見互相鈍置
豈不箇箇英靈底漢還會也無歸堂

上堂云虛空爲鼓須彌爲槌打者甚多聽者
極少且問誰是解打者莫謗鹽官好只如南
泉道王老師不打者破鼓法眼去王老師不
打兩箇既不奈何一箇更是憊懼

上堂云還有鬧市裏出頭底麼良久云不如
策杖歸山去長嘯一聲煙霧深便下座
舉僧問趙州學人乍入叢林乞師指示州云

喫粥了也未云喫粥了也州云洗鉢盂去雲
門大師云且道有指示無指示若云有向他
道什麼若道無何得悟去師拈云我不似雲
門爲蛇畫足直言向爾道問者如蟲蝕木答
者偶爾成文然雖恁麼瞎却衲僧眼作麼生

免得此過諸仁者要會麼還爾趙州喫粥未

拈却者僧喫粥了雪實與爾拄杖子歸堂
舉雲門大師云盡十方世界乾坤大地天下
老和尚以拄杖一畫云百雜碎師云者老漢
是即是要且未有出身之路如今拄杖在雪

實手裏復橫按云廿四東西南北甚處得來
舉僧問投子如何是十身調御投子下繩牀
立又問凡聖相去多少投子下繩牀立師云

此公案諸人無不委知若滑麼舉天下衲僧
盡爲念話杜家雪實莫有長處也無試爲大
衆舉看凡聖相去多少投子下繩牀立如何

是十身調御投子下繩牀立且道與前來舉
底同別若道一般許上座具一隻眼若云別
有奇特也許上座具一隻眼復更開一線道

凡聖相去多少請上座下一轉語如何是十
身調御答一轉語非但參見投子亦乃知雪
實長處或若總道下繩牀立惜取眉毛便下
座

舉洞山聰和尚每見新到便問瀉山水牯牛
上座作麼生會前後皆不相契師到亦乃垂

問師云後人標榜洞山擬道師以坐具拂一下便行洞山云且來上座師云未參堂

舉雲門大師云三乘十二分教達磨西來放過即不可若不放過不消一喝師隨舉了便喝復云大衆好喝落在甚處若要鼻孔透天

辯取者一喝便下座

師因事示衆云杜耳目於胎殼掩玄象於霄外而責宮商之異辯玄素之殊底是甚麼人還知落處麼那一箇者一箇兼本三人放過一著便下座

上堂云三十年來尋劍客有麼有麼幾迴葉落又抽枝衲僧眼光失却了也自從一見桃華後填溝塞壑直至如今更不疑敗軍之將以拄杖卓地一下云看便下座

舉歸宗問僧甚處去云諸方學五味禪去宗云我者裏有一味禪爲甚不學僧云如何是一味禪宗便打僧云莫打某甲會也宗云爾作麼生會僧擬開口宗又打黃檗聞舉云馬大師出八十四員善知識問著箇箇肩輓地只有歸宗老較些子師云以彊欺弱有甚

麼難我者裏有一味禪爲甚麼不學但向道收待伊拈起有般無眼漢只管喫咩咩咩雪竇門下誰敢便下座

上堂云胡蜂不戀舊時窠猛將不在家中死若是箇漢聊聞舉著別起眉毛便行

一日六人新到師問云還有作家禪客麼衆頭云和尚道什麼師云點即到僧擬議師便喝僧無語師云龍頭蛇尾復問第二箇僧指衆頭云和尚問何不祇對師與一掌僧無語師復指云第三其僧茫然師云一狀領過

上堂僧問如何是時節因緣師云瞌睡漢僧便喝師云詐惺惺復云譬若世界壞時大水競作其間無量衆生或沒或沒互相悲號仰望蒼蒼皆云相救當爾之時四禪天人一見高聲便喝咄哉衆生我預曾報汝令頻頻上來汝都不聽如今有甚麼救處乃拍手一下云歸堂

上堂云乾坤之內宇宙之間中有一寶挂在壁上達磨九年不敢正眼觀者如今衲僧要見劈脊打

上堂僧問如何是佛師云頭鬚鬚耳卓朝學云不會師云堪笑堪悲復云不著便也不奈何爾從江南江北來笠子下爲什麼拶破洛浦徧參底

上堂云乾坤把定即不無爾作麼生是手擎日月底句又云周遊四天下道我知有須彌頂上著得幾人復云舉步已經諸佛刹是爾卓鞋踏破多少

上堂云長青鳥芳樹不棲喃喃獨語摩斯吡澄溪不入戰戰却迴三十年後悟去提起手云叫便下座

上堂舉在衆日僧問如何是佛師云四衆圍繞如何是涅槃師云雙林樹下復云便是釘嘴鐵舌漢也卒話會不及歸堂

有時豎起拄杖云洪機在掌排巨靈摩太華之峯復橫按云明鏡當臺絕演若逐東西之徑又以拄杖一劃云比擬張麟兔亦不遇便下座

上堂云不與一法作對便是無諍三昧或是箇漢聞我舉著惡能坐斷有甚麼近處雖然

如此向後莫辜負人好便下座

上堂舉古人道明眼漢沒窠臼我且問爾各從德山臨濟下來棒喝向爾不能施語言向爾使不著我既如此汝合必然又作麼生露得箇消息令雪竇知爾是箇風不入底漢去

便下座

一日三僧辭師把住云天無門地無戶亂走衲僧擬往何處僧皆無對師劈面唾云枉喫我多少粥飯便推出

示衆云摩竭正令譬若披沙揀金毗耶杜辭頭類守株待免設使頓開千眼未辯機關點著不來白雲萬里

舉永嘉云六般神用空不空一顆圓光色非色雲門大師拈起拄杖云是色非色師云雪竇即不然圓光一顆儻侗真如神用六般和泥合水填窰人設齋且致水中拈月致將一問來

有時云袖頭打領腋下剗襟諸方一任剪裁南山起雲北山下雨袖子作麼生話會一日上堂大衆纔集師云一任諸方斲剝便

下座

舉僧問乾峯十方薄伽梵一路涅槃門路頭在什麼處乾峯云在者裏師代僧便喝復有僧問長慶長慶云問取堂中第二座師代僧云錯復有僧問師師云墮坑落澗自代云作賊人心虛

上堂云糞掃堆上現丈六金身遇賤則貴赤肉團上壁立千仞遇明則暗鼻孔遼天底衲僧試辯雪竇爲人眼

示衆云一法不通萬緣方透會與不會成羣作隊築著磕著一時拈却管取乾坤獨露便下座

上堂云禪河隨浪靜定水逐波清若拄杖子是浪衲僧便七縱八橫忽乾坤大地是浪便見扶籬摸壁且道放行好把定好一日云春雷已發陽鳥未啼迷身句即不問爾透出一字作麼生道

上堂云巢知風穴知雨靈利衲僧未可相許若問如何苦哉佛陀參舉馬大師云一切語言是提婆宗以者箇爲

主雲門大師云好語只是無人問我僧便問如何是提婆宗雲門云西天九十六種爾是最下種師云赤幡被者僧奪了也便下座一日云山河無隔礙光明處處透傳大士騎驢入爾鼻孔裏見爾諸人不惺惺却歸雙林寺去也便下座

舉僧問翠微自到和尚法席每沐上堂不蒙一法示誨意在於何微云嫌箇什麼僧復問洞山云爭怪得老僧後有僧問法眼眼云祖師來也師云兩箇老漢被者僧穿却唯有法眼與他同參若是雪竇門下喫棒了趕出

上堂云種種幻化皆生如來圓覺師云住住三世諸佛是幻六代祖師是幻天下老和尚是幻復拈起拄杖云拄杖子是幻那箇是圓覺良久以拄杖擊繩牀一下云幻出大衆擬議師云者一隊漆桶總無孔竅以拄杖一時趁下

舉夾山問僧甚處來云湖南來山云曾到石霜麼云要路經過爭得不到山云承聞石霜有毬子話是否云和尚也須急著眼山云作

麼生是毬子云越不出云作麼生是毬杖云
勿手足山云老僧未曾與閣黎相識出去師
云雪竇親見者僧從石霜來夾山因甚麼道
不相識

舉趙州問僧甚處來云雪峯來州云雪峯近
日有何言句示徒僧云雪峯道盡大地是沙
門一隻眼爾諸人向什麼處伺州云爾若過
嶺我附箇鉢子去師云者僧既不從雪峯來
可惜趙州鉢子

舉僧問石霜三千里外遠聞石霜有箇不顧
霜云是僧云只如萬像歷然是顧不顧霜云
我道不驚衆僧云不驚衆是不與萬像合如
何是不顧霜云徧界不曾藏師拈云誰是不
顧者

示衆云世界與麼廣闊為甚麼向雪竇手裏
乞命

上堂云乾坤側日月星辰一時黑東西不辯
南北不分底衲僧向甚處見雪竇
上堂僧問雪覆蘆華時如何師云點僧云恁
麼則為祥為瑞也師云兩重公案復成一頌

雪覆蘆華欲暮天謝家人不在魚船白牛放
却無尋處空把山童贈鐵鞭

師問大龍語底默底不是非語非默底更非
總是總不是拈却大用現前時人知有大龍
如何龍云子有如是見解那師云這老漢今
日瓦解冰消至晚龍問師那裏是老僧瓦解
冰消處師云轉見不堪拂袖便出龍云巨耐
巨耐師不顧後舉似福嚴雅雅云何不與他
本分草料師云和尚更買草鞋行脚始得
僧問只在目前為甚麼再三不覩師云截耳
卧街云黑豆未生芽時如何師云餒驢餒馬
云生芽後如何師云透水透沙

明覺禪師語錄卷第二

明覺禪師語錄卷第二

校勘記

- 一 底本，明永樂北藏本。
- 一 八六二頁上二行「門人一軫等編」，
〔南〕作「僧錄司右闡教兼靈谷禪寺
住持淨戒重校」；〔徑〕作「門人軫等
編」。
- 一 八六二頁中一三行「臨濟」，〔南〕作
「林際」，下同。又第一三三「際」，
〔徑、清〕作「濟」，一四行第九字同。
- 一 八六四頁上一〇行第一二字「師」，
〔南〕無。
- 一 八六五頁中一八行「新州」，〔南〕作
「辛州」。
- 一 八六六頁上二行「明覺禪師後錄」，
〔南〕無。
- 一 八六六頁上末行第三字「超」，〔徑〕
作「起」。
- 一 八六九頁中一九行第七、八字「跨
跳」，〔南〕作「教跳」。下同。
- 一 八六九頁下五行第七字「師」，〔南〕

無。

一 八七〇頁上五行「靈利」，南作「劍利」。下同。

一 八七〇頁中四行「皈依」，南、徑、清作「皈依」。

一 八七〇頁下七行第六字「悟」，徑作「悞」。第一二字同。

一 八七一頁中一〇行第八字「打」，南作「脱」。

一 八七一頁下四行第八字「畫」，南作「劃」。

一 八七二頁下一四行第三字「舌」，徑作「石」。

一 八七三頁上一五行「僮伺」，南作「慵統」；清作「僮伺」。

一 八七四頁中二行末字「鞭」下，南有「示衆云青山疊亂青春水漾虛碧寥寥天地間獨立望何極便下座却顧侍者云適來有人看方丈麼者云有師云作賊人心虛」一段。

一 八七四頁中九行末字「得」下，南有「師問僧近離甚處云和尚道甚

麼師云我問你近離甚處僧退身而立師云克由耐耐不言來處將拄杖來僧云甲近離奉川師云打野樵漢何不早恁麼道復問第二人云你也一處來云某甲近離大梅師云兩段不同好與三十棒且放過」一段。

明覺禪師語錄卷第三

綺

參學小師九試等編

拈古

師舉德山示衆云今夜不答話問話者三十棒時有僧出禮拜山便打僧云某甲話也未

問山云爾是甚處人云新羅人山云未踏船

舡好與三十棒法眼拈云大小德山話作兩

極圓明道大小德山龍頭蛇尾師云二老宿

雖善裁長補短捨重從輕要見德山亦未可

何故德山大似握閩外威權有當斷不斷不

招其亂底劍諸人要識新羅僧麼只是撞著

露柱底箇瞎漢

舉雪峯一日普請自負一束藤路逢一僧峯

便拋下僧方擬取峯便踏倒歸舉似長生乃

云我今日踏者僧快生云和尚替者僧入涅槃

堂始得峯便休去師云長生大似東家人

死西家助哀也好與一踏

舉百丈再參馬祖侍立次祖以目視禪牀角

頭拂子丈云即此用離此用祖云爾他後開

兩片皮將何爲人文取拂子豎起祖云即此

用離此用丈挂拂子於舊處祖便喝百丈直

得三日耳聾師云奇怪諸禪德如今列其派

者甚多究其源者極少總道百丈於喝下大

悟還端的也無然刀刀相似魚魯參差若是

明眼漢瞞他一點不得只如馬祖道爾他後

開兩片皮將何爲人百丈豎起拂子爲復如

蟲禦木爲復啐啄同時諸人要會三日耳聾

麼大冶精金應無變色

舉崇壽指凳子云識得凳子周而有餘雲門

云識得凳子天地懸殊師云澤廣藏山理能

伏豹

舉永嘉大師到六祖繞禪牀三匝振錫一下

卓然而立祖云夫沙門具三千威儀八萬細

行大德從何方而來生大我慢師便喝乃云

當時若下得者一喝免見龍頭蛇尾又再舉

繞禪牀三匝振錫一下卓然而立代祖師云

未到曹溪與爾三十棒了也

舉仰山指雪師子云還有過得此色者麼雲

門云當時便與推倒師云只解推倒不能扶

起

舉香嚴垂語云如人上樹口嚼樹枝手不攀

枝脚不踏樹樹下有人問西來意不對則違

他所問若對又喪身失命當恁時作麼生即

是有虎頭上座上樹即不問未上樹請和

尚道嚴呵呵大笑師云樹上道即易樹下道

即難老僧上樹也致將一問來

舉僧問魯祖如何是不言言祖云爾口在什

麼處僧云某甲無口祖云將什麼喫飯僧無

語師云好劈脊便棒者般漢開口了合不得

合口了開不得

舉僧問雪峯古澗寒泉時如何峯云瞪目不

見底僧云飲者如何峯云不從口入僧舉到

趙州州云不可從鼻孔裏入僧却問趙州古

澗寒泉時如何州云苦云飲者如何州云死

雪峯聞舉云趙州古佛從此不答話師云衆

中總道雪峯不出者僧問頭所以趙州不肯

如斯話會深屈古人雪實即不然斬釘截鐵

本分宗師就下平高難爲作者

舉僧問西堂和尚有問有答賓主歷然無問

無答時如何堂云怕爛却去那僧問長慶有

問有答賓主歷然無問無答時如何慶云相逢盡道休官去林下何曾見一人師云何不與本分草料

舉臨濟示衆云我於先師處三度喫六十棒如蒿枝子拂相似如今思一頓棒喫誰爲下

手僧出衆云某甲下手濟拈棒與僧僧擬接便打師云臨濟放處較危收來太速

舉欽山一日上堂豎起拳又開云開即爲掌五指參差復握云如今爲拳必無高下還有商量也無一僧出衆豎起拳山云爾只是箇

無開合漢師云雪竇即不然乃豎起拳云握則爲拳有高有下復開云開則成掌無黨無偏且道放開爲人好把定爲人好開也造車握也合轍若謂閉門造車出門合轍我也知爾向鬼窟裏作活計

舉僧問睦州高揖釋迦不拜彌勒時如何州云昨日有人問趕出了也僧云和尚恐某甲不實州云拄杖不在蒼苔柄聊與三十師云睦州只有受壁之心且無割城之意
舉棗樹問僧近離甚處云漢國樹云天子還

重佛法也無僧云苦哉賴值問著某甲問著別人即禍生云作箇什麼僧云人尚不見有何佛法可重云闍黎受戒多少時僧云二十夏云大好不見有人便打師云者僧棒即喫要且去不再來棗樹令雖行李奈無風起浪

舉趙州問婆子什麼處去云偷趙州笋去州云忽遇趙州又作麼生婆子便掌州便休去師云好掌更下兩掌也無勘處

舉保壽開堂日三聖推出一僧壽便打聖云溜麼爲人瞎却鎮州一城人眼去在壽便歸方丈師云保壽三聖雖發明臨濟正法眼藏要且只解無佛處稱尊當時者僧若是箇漢纔被推出便掀倒禪牀直饒保壽全機也較三千里

舉無業馬祖僧問如何是佛云莫妄想師云塞却鼻孔又問如何是佛云即心是佛師云拄却舌頭

舉僧問德山從上諸聖什麼處去山云作麼作麼僧云勅點飛龍馬跛鼈出頭來山便休去至來日山浴出其僧過茶與德山山撫僧

背一下僧云者老漢方始瞥地師云然精金百煉須要本分鉗鎚德山既以已方人者僧還同受屈以拄杖一劃云適來公案且致從上諸聖什麼處去大衆擬議師一時打趁舉保福簽瓜次太原孚上座到來福云道得

與爾瓜喫乎云把將來福度一片瓜與孚孚接得便去師云雖是死蛇解弄也活誰是好手者試請辯看

舉南泉示衆云道非物外物外非道趙州出問如何是物外道泉便打州云和尚莫打某甲向後錯打人去在泉云龍蛇易辨柗子難瞞師云趙州如龍無角似蛇有足當時不管盡法無民直須喫棒了趁出

舉洞山到雲門門問近離甚處山云查渡云夏在其處山云湖南報慈云甚時離山云去年八月門云放爾三頓棒山至來日却上問訊昨日蒙和尚放三頓棒不知過在什麼處門云飯氣子江西湖南便溜麼去山於此大悟師云雲門氣字如王撈著便冰消瓦解當時若據令而行子孫也未到斷絕

舉一僧參馬大師師畫一圓相云入也打不入也打僧便入師便打僧云和尚打某甲不得大師靠却拄杖休去師云二俱不了和尚打某甲不得靠却拄杖擬議不來劈脊便打舉興化問克賓維那不久爲唱道之首賓云不入者保杜化云會來不入不會不入賓云沒交涉化便打乃云克賓維那法戰不勝罰錢五貫充設饋飯至來日齋時興化自白槌云克賓維那法戰不勝不得喫飯即便趕出師云克賓要承嗣興化罰錢出院且致却須索取者一頓棒始得且問諸人棒既喫了作麼生索雪竇要斷不平之事今夜與克賓維那雪屈以拄杖一時打散

須辯箇得失且大慈識病不答話時有僧出便歸方丈雪竇識病不答話或有僧出劈脊便打諸方識病不答話有僧出必然別有長處敢有一箇動著大唐天子只三人

舉趙州到黃檗檗見來便關却方丈州云救火救火黃檗便出擒住云道道州云賊過後張弓師云直是好笑笑須三十年忽有箇袖僧問雪竇笑箇什麼笑賊過後張弓

舉僧問鏡清學人未達其源乞師方便清云是什麼源云其源清云若是其源爭受方便師云死水裏浸却有什麼用處侍者問適來成褫伊清云無侍者云不成褫伊清云無侍者云和尚尊意如何清云一點水墨兩處成龍師云猶較些子雪竇不是減鏡清威光要與者僧相見是什麼源其源三十年後與爾三十棒

舉僧問香林如何是衲衣下事林云臘月火燒山師云臘月燒山萬種千般翹松鶴冷踏雪人寒達磨不會大難大難

舉本仁和尚示衆云尋常不欲向聲前句後

鼓弄人家男女何故且聲不是聲色不是色時有僧問如何是聲不是聲仁云喚作色得麼云如何是色不是色仁云喚作聲得麼僧禮拜仁云且道爲汝說答汝話若人辯得有箇入處師云本仁也甚奇怪要且貪觀天上既非聲前句後且作麼生入

舉雲門示衆云老胡生下一手指天一手指地周行七步目顧四方天上天下唯我獨尊當時若見一棒打殺與狗喫却貴圖天下太平師云便與掀倒禪牀

舉國師三喚侍者點即到侍者三應到即不點將謂吾辜負汝誰知汝辜負吾瞞雪竇不得雲門道作麼生是國師辜負侍者處會得也是無端師云元來不會作麼生是侍者辜負國師粉骨碎身未報得師云無端無端復舉僧問投子國師三喚侍者意旨如何投子云抑逼人作麼師云塚根漢僧問興化化云一盲引衆盲師云端的瞎僧問玄沙沙云侍者却會師云停囚長智僧問趙州州云如人暗中書字字雖不成文彩已彰師便喝僧

問雪竇雪竇便打也要諸方點檢乃成頌云
師資會遇意非輕無事相將草裏行負汝負
吾人莫問任從天下競頭爭

舉僧問智門和尚如何是佛云踏破草鞋赤
脚走僧云如何是佛向上事云拄杖頭上挑

日月師云千兵易得一將難求

舉師祖問南泉摩尼珠人不識如來藏裏親
收得如何是如來藏云王老師與爾往來者
是藏師云草裏漢祖云不往不來者云亦是
藏師云雪上加霜祖云如何是珠師云嶮百

尺竿頭作伎倆不是好手者裏著得箇眼賓
主互換便能深入虎穴或不習麼縱饒師祖
悟去也是龍頭蛇尾漢

舉僧禮拜雪峯打五棒僧云某甲有什麼
過峯又打五棒師云雪竇不曾與人葛藤前
五棒日照天臨後五棒雲騰致雨爾若辯得
也好與五棒

舉馬大師令智藏馳書上徑山山接書開見
一圓相於中下一點國師聞舉云欽師猶被
馬師惑師云徑山被惑且致若將呈似國師

別作箇什麼伎倆免被惑去有老宿云當時
坐却便休亦有道但與劃破若與麼只是不
識著敢謂天下老師各具金剛眼睛廣作神
通變化還免得麼雪竇見處也要諸人共知
只者馬師當時畫出早自惑了也

舉鏡清問僧趙州喫茶去爾作麼生會僧便
出去清云邯鄲學步師云者僧不是邯鄲人
爲什麼學唐步若辯得出與爾茶喫

舉僧問雲門如何是法身上事云向上與
爾道即不難作麼生會法身僧云請和尚鑑
云鑑即且致作麼生會法身僧云與麼與麼
云者箇是長連牀上學得底我且問爾法身
還喫飯麼僧無語師云將成九仞之山不進
一簣之土過在什麼處

舉趙州訪茱萸纔上法堂茱萸云看箭州亦
云看箭茱萸云過州云中師云二俱作家蓋
是茱萸趙州二俱不作家箭鋒不相拄直饒
齊發齊中也只是箇射梁漢

舉臨濟與普化去施主家齋濟問毛吞巨海
芥納須彌爲復是神通妙用爲復法爾如然

化場倒飯林濟云太羸生化云者裏是甚所
在說麤說細濟休去至來日又同赴一施主
春濟復問今日供養何似昨日化又踢倒飯
林濟云太羸生化云瞎漢佛法說什麼麤細
濟吐舌師云兩箇老賊喫飯也不了好與二
十棒棒雖行且那箇是正賊

舉三角示衆云若論此事上眉毛早是蹉
過麻谷出云蹉過即不問如何是此事角云
蹉過谷便掀倒禪林三角便打師云兩箇有
頭無尾漢眉毛未曾眨上說什麼此事蹉過
有僧問眉毛爲什麼不眨上師便打

舉睦州喚僧大德僧迴首州云擔版漢師云
睦州只具一隻眼何故者僧喚既迴頭因甚
却成擔版

舉巖頭系德山跨門便問是凡是聖德山便
喝巖頭便禮拜洞山聞舉云若不是巖公大
難承當巖頭云洞山老漢不識好惡我當時
一手擡一手搦師云然則德山門下草偃風
行要且不能塞斷人口當時繞禮拜勞香便
打非唯勸絕洞山亦乃把定齋老還會麼李

將軍有嘉聲在不得封侯也是閑

舉巴陵示眾祖師道不是風動不是旛動既不是旛風向什麼處著有人與祖師作主出來與巴陵相見師云雪竇道風動旛動旛是風旛向甚處著有人與巴陵作主亦出來與雪竇相見

舉則川與龐居士摘茶次士云法界不容身師還見我麼川云若不是老師洎與龐公答話士云有問有答蓋是尋常川不管士云適來莫怪相借問麼川亦不管士喝云者無禮

儀漢待我一一舉似明眼人去在川拈茶籃便歸師云則川只解把定封疆不能同生同死當時好與將下幘頭誰敢喚作龐居士舉僧問雲門一言道盡時如何門云裂破師彈指三下

舉僧問睦州一言道盡時如何州云老僧在爾鉢裏裏師呵呵大笑

舉本生和尚以拄杖示眾云我若拈起爾便向未拈起時作道理我若不拈起爾便向拈起時作主宰且道老僧為人在甚處時有僧

出云不敢妄生節目生云也知閣黎不分外

僧云低低處平之有餘高高處觀之不足生云節目上更生節目僧無語生云掩鼻偷香空招罪犯師云者僧也善能切磋爭奈弓折箭盡然雖如此且本生是作家宗師拈起也

天迴地轉應須拱手歸降放下也草偃風行必合全身速害還見本生為人處也無師復拈起拄杖云太平本是將軍致不許將軍見太平

舉僧問雪峯聲聞人見性如夜見月菩薩人見性如晝見日未審和尚見性如何峯打三下其僧復問巖頭巖頭打三掌師云應病設藥且與三下若據令而行合打多少

舉太原孚上座參雪峯至法堂上顧視雪峯便下看知事師云一千五百人作家宗師被孚老一覷便高豎降旗孚到來日入方丈云昨日觸忤和尚峯云知是般事便休師云果然僧問雲門作麼生是觸忤處門便打師云打得百千萬箇有什麼用處直須盡大地人喫棒方可扶豎雪峯且道太原孚具什麼眼

舉安國問僧得之於心伊蘭作梅檀之樹失之於旨甘露乃疾藜之園我要箇語具得失兩意僧豎起拳云不可喚作拳頭國云只為喚作拳頭師云無繩自縛漢拳頭也不識

舉僧請益雲門大師玄沙三種病人話門云

爾禮拜著僧禮拜起門以拄杖便捏僧退後門云爾不是患盲復喚近前來僧近前門云爾不是患聾乃云還會麼僧云不會門云爾不是患瘧僧於此有省師便喝云者盲聾瘧瘧漢若不是雲門驢年去如今有底或拈杖

豎拂不管教近前又不來還會麼不應諸方還奈何得麼雪竇若不奈何爾者一隊驢漢有堪作箇什麼以拄杖一時打趁

舉僧問香巖如何是王索仙陀婆嚴云過者邊來師云鈍置殺人僧問趙州王索仙陀婆時如何州曲躬叉手師云索壚奉馬

舉鼓山示眾云若論此事如一口劍時有僧問承和尚有言若論此事如一口劍和尚是死屍學人是死屍如何是劍山云拖出者死屍僧應諾歸衣鉢下打撲便行山至晚問首

時如何州曲躬叉手師云索壚奉馬

座問話僧在否座云當時便去也山云好與二十棒師云諸方老宿總道鼓山失却一隻眼殊不知重賞之下必有勇夫然雖如此若仔細點檢來未免一時埋却

舉陸州問武陵長老了即毛端吞巨海始知

十五

十三

大地一微塵作麼生和尚問誰州云問長老云何不領話州云我不領話爾不領話師云墮也墮也復云者葛藤老漢好與劃斷拈拄杖云什麼處去也

舉仰山坐次大禪佛到翹一足云西天二十

八祖亦如是唐土六祖亦如是和尚亦如是某甲亦如是山下禪牀打四藤條師云藤條未到打折因什麼只與四下須是箇斬釘截鐵漢始得大禪後到蒼山自云集雲峯下四藤條天下大禪佛峯山云打鐘著禪便走師

云者漢雖見機而變爭奈有頭無尾

舉玄沙與天龍入山見虎龍云前面是虎沙云是汝師云要與人天為師前面端的是虎舉南泉山下有一菴主行僧經過謂菴主云近日南泉和尚出世何不去禮拜主云非但

南泉直饒千佛出興亦不能去泉聞令趙州去看州見便禮拜主不管州從西過東主亦不管州又從東過西主亦不管州云草賊大敗拽下簾子便行歸舉似南泉泉云從來疑者者漢師云大小南泉趙州被箇擔版漢勘破了也

舉僧問風穴語默涉離微如何通不犯穴云常憶江南三月裏鷓鴣啼處百華鮮曾有僧問雪竇對他道劈腹剜心又且如何復云因風吹火別是一家傷驚怒龜必應有主

舉巖頭雪峯欽山到德山欽山問天皇也恁麼道龍潭也恁麼道未審德山作麼生道山云爾試舉天皇龍潭底看欽山擬議德山便打欽山被打歸延壽堂云是即是打我大殺巖頭云爾恁麼他後不得道見德山師云諸禪德欽山致箇問端甚是奇特爭奈龍頭蛇尾爾試舉天皇龍潭底看坐具便撼大丈夫漢將虎鬚也是本分他既不能德山令行一半令若盡行雪峯巖頭總是涅槃堂裏漢舉僧問智門和尚如何是般若體云蚌含明

月僧云如何是般若用云兔子懷胎師云非唯把定世界亦乃安貼那家若善能參詳便請丹霄獨步

舉烏曰有玄紹二上座到曰云二禪伯近離甚處云江西曰便打僧云久聞和尚有此機要曰云爾既不會第二箇近前來僧擬議曰亦打云同坑無異土叅堂去師云宗師眼目須至恁麼如金翅擘海直取龍吞有般漢眼目未辯東西拄杖不知顛倒只管說照用同時人境俱奪

舉僧辭大隨隨問甚處去云峨眉禮拜普賢去隨豎起拂子云文殊普賢總在者裏僧畫一圓相拋於背後隨云侍者將一貼茶與者僧雲門別云西天斬頭截臂者裏自領出去師云殺人刀活人劍具眼底辯取

十五

舉雪峯問僧見說大德曾為天使來是否云不敢峯云爭解與麼來僧云仰慕道德豈憚關山峯云汝猶醉在出去僧便出峯乃召大德僧迴首峯云是什麼僧亦云是什麼峯云者漆桶僧無語峯却顧謂鏡清云好箇師僧

向漆桶裏著到清云和尚豈不是據欵結案
峯云也是我尋常用底忽若喚迴是什麼被
他道者漆桶又作麼生清云成何道理峯云
我與麼及伊爾又道據欵結案他與麼及我
又道成何道理一等是什麼時節其間有得
不得清云不見道醍醐上味為世所珍遇此
之人翻成毒藥師云看他父子相投言氣相
合知者謂粉骨碎身此恩難報不知者謂扶
高抑下臨危悚人毒藥醍醐千載龜鑑還會
麼者漆桶

舉僧問大梅如何是祖師西來意梅云西來
無意僧舉到鹽官云一箇棺材兩箇死漢玄
沙聞舉云鹽官是作家師云三箇也得
舉雲門問新羅僧爾是甚處人云新羅人門
云將什麼過海云草賊大敗門云為什麼在
我手裏云恰是門云一任教趙師云雲門老
漢龍頭蛇尾放過者僧為什麼在我手裏恰
是劈脊便打
舉北禪問僧近離甚處云黃州禪云夏在甚
處云資福禪云福將何資云兩重公案禪云

爭奈在我手裏云在手裏即收取禪便打老
僧不甘隨後越出師云奇怪宛有超師之作
還知者僧麼只解貪前不能顧後若在雪竇
手裏棒折也未放在

舉睦州示衆云我見百丈不識好惡大眾方
集以拄杖一時打下復召大眾迴首丈云是
什麼有什麼共語處黃檗和尚大眾方集以
拄杖一時打下復召大眾迴首檗云月似彎
弓少雨多風猶較些子師云說什麼猶較直
是未在若據雪竇衆集一時打下便休或有

箇無孔鐵槌為衆竭力善能擔荷可以籠罩
古今乾坤把斷師薦拈拄杖云放過一著
舉玄沙見鼓山來作一圓相山云人人出者
箇不得沙云情知爾向驢胎馬腹裏作活計
山云和尚又作麼生玄沙云人人出者箇不
得山云和尚潛麼道得某甲為什麼不得沙
云我得爾不得師云只解貪觀白浪不知失
却手橈
舉南泉示衆云王老師賣身去也還有人買
麼一僧出衆云某甲買泉云不作貴不作賤

作麼生買僧無語卧龍代云和尚屬尊卑未
山云是何道理趙州云明年與和尚作領布
衫師云雖然作家競買要且不解輪機且道
南泉還肯麼雪竇也擬酬箇價直令南泉進
且無門退亦無地不作貴不作賤作麼生買
別處容和尚不得

舉茱萸把一椀竹上堂云還有虛空裏釘得
椀麼時有靈虛上座出云虛空是椀茱萸便
打虛云莫錯打某甲茱萸休去師云若要此
話大行直須打了越出

舉夾山與定山同行言語次定山云生死中
無佛則無生死夾山云生死中有佛則不迷
生死互相不肯同上大梅相見了具說前事
夾山問未審那箇親那箇疎梅云一親一疎
山又問那箇親梅云且去明日來夾山至來
日又問未審那箇親梅云親者不問問者不
親夾山住後云我當時在大梅失却一隻眼
師云夾山畢竟不知換得一隻眼大梅老漢
當時聞舉若以棒一時打出豈止割斷兩人
葛藤亦乃為天下宗匠

舉僧問保福雪峯平生有何言句得似癡
挂角時福云我不可作雪峯弟子不得師云
一千五百箇布衲保福較些些子

舉僧問長慶羶羊未挂角時如何慶云草裏
漢云挂角後如何慶云亂叫喚云畢竟如何

慶云驢事未了馬事到來師云寧可碎身若

微塵終不瞎箇衆生眼長慶較些些子復云

一般漢設使羶羊未挂角也似萬里望鄉關

舉僧問巴陵祖意教意同別陵云雞寒上樹

鴨寒下水僧問睦州祖意教意同別州云青

山自青山白雲自白雲師云問既一般答亦

相似其中有利他自利瞞人自瞞若點檢分

明管取解空第一

舉趙州示衆云今夜答話去有解問者出來

時有僧出州云比來拋擲引玉引得箇墜子

法眼和尚遂乃舉問覺鐵嘴先師意作麼生

覺云如國家拜將乃問其人去得時有人出

云某甲去得云爾去不得法眼云我會也師

云靈利漢聞舉便知落處然雖如此放過覺

鐵嘴夫宗師語不虛發出來必是作家因什

慶拋擲引擊諸禪德要識趙州慶從前汗馬
無人見只要重論蓋代功

舉航源辭國師歸省觀馬祖於地上作一圓

相展坐具禮拜祖云子欲作佛去源云某甲

不解捏目祖云吾不如汝師云然猛虎不食

其子爭奈來言不豐諸人要識航源慶只是

箇藏身露影漢

舉瀉山問仰山甚處來云田中來瀉云田中

多少人山插下鉢子叉手而立瀉云南山大

有人刈茆山拈得鉢子便行玄沙云我當時

若見與踏倒鉢子鏡清云不奈船何打破岸

斗僧問明招古人意在插鉢處叉手處招喚

某甲僧應諾招云還曾夢見仰山麼師云諸

方老宿咸謂插鉢話奇特也大似隨邪逐惡

若據雪竇見處仰山被瀉山一問直得草繩

自縛去死十分

舉玄沙問僧近離甚處云瑞巖沙云瑞巖有

何言句僧云長喚主人翁自云諾醒醒著他

後莫受人瞞沙云一等是弄精覓甚奇怪却

云何不且在彼中僧云瑞巖遷化也沙云如

今還喚得應麼無對師云蒼天蒼天

舉雪峯問僧近離甚處云覆船峯云生死海

未渡爲什麼覆船師代云久響雪峯待者老

漢擬議拂袖便行其僧當時無語歸舉似覆

船船云何不道渠無生死僧再至雪峯舉此

語峯云此不是爾語云是覆船恁麼道峯云

我有二十棒寄與覆船二十棒老僧自喫不

干閣黎事師云能區能別能殺能活若也辯

得天下橫行

舉德山圓明示衆云但有問答只豎一指頭

寒則普天普地寒師云什麼處見俱胝老熱

則普天普地熱師云莫錯認定盤星森羅萬

像徹下孤危大地山河通上嶮絕甚麼處得

一指頭禪

舉僧問南院從上諸聖什麼處去院云不上

天堂即入地獄云和尚作麼生院云還知寶

應老落處麼僧擬議院以拂子摹口打復喚

僧近前云令合是爾行又打一拂子師云令

既自行且拂子不知來處雪竇道箇瞎且要

雪上加霜

舉保福問長慶盤山道光境俱忘復是何物
洞山道光境未忘復是何物據二老宿總未
得勦絕作麼生道得勦絕去慶良久福云情
知向鬼窟裏作活計慶云爾作麼生福云兩
手扶犁水過膝師云俱忘未忘總由我保福
因什麼道未得勦絕第五然能有幾箇諸人又
作麼生道免得長慶在鬼窟裏師云柳絮隨
風自西自東
舉大梅聞鼯鼠鳥聲謂衆云即此物非他物
汝善護持吾當逝矣師云者漢生前莽鹵死
後顛頑即此物非他物是何物還有分付處
也無有般漢不解截斷大梅脚跟只管道會
程太速
舉雪峯示衆云望州亭與爾相見了也烏石
嶺與爾相見了也僧堂前與爾相見了也保
福問鵝湖僧堂前且致望州亭烏石嶺什麼
處相見鵝湖驟步歸方丈保福便入僧堂師
云二老宿是即是只知雪峯放行不見雪峯
把定忽有箇衲僧出問未審雪竇作麼生豈
不是別機宜識休欲底漢還有望州亭烏石

嶺相見底衲僧麼良久云擔版禪和如麻似
粟
舉趙州問大慈般若以何爲體慈云般若以
何爲體州呵呵大笑至來日州掃地次大慈
却問般若以何爲體州放下掃帚呵呵大笑
師云前來也笑後來也笑笑中有刀大慈還
識麼直饒識得也未免喪身失命
舉德山一日飯遲自掌鉢至法堂上雪峯見
云者老漢鍾未鳴鼓未響托鉢向什麼處去
德山便回峯舉似巖頭頭云大小德山不會
末後句山聞舉令侍者喚巖頭至方丈問爾
不肯老僧那巖頭密啓其意山至來日上堂
與尋常不同巖頭到僧堂前撫掌大笑云且
喜得老漢會末後句他後天下人不奈何雖
然如此只得三年明招代德山云咄咄沒處
去沒處去師云曾聞說箇獨眼龍元來只有
一隻眼殊不知德山是箇無齒大蟲若不是
巖頭識破爭得明日與昨日不同諸人要會
末後句麼只許老胡知不許老胡會
舉雪峯一日見獼猴乃云者獼猴各各背一

面古鏡三聖便問歷劫無名何以彰爲古鏡
峯云瑕生也聖云一千五百人善知識話頭
也不識峯云老僧住持事煩師云好與二十
棒者棒放過也好免見將錯就錯
舉僧問國師如何是本身盧舍那云與老僧
過淨瓶來僧將到淨瓶云却安舊處著僧復
問如何是本身盧舍那云古佛過去久矣雲
門大師道無朕跡師云直得一只手天一手
指地爭得無還會麼雲在嶺頭閑不徹水流
澗下太忙生
舉僧問洞山時時勤拂拭莫遣惹塵埃爲什
麼不得他衣鉢山云直饒道本來無一物也
未合得他衣鉢且道什麼人合得僧下九十
六轉語皆不相契末後云設使將來他亦不
要洞山深肯師云他既不受是眼將來底必
應是瞎還見祖師衣鉢麼若於此入門便乃
兩手分付非但大庾嶺頭一箇提不起設使
闍國人來且欸欸將去
舉僧問投子依稀似半月髮象若三星乾坤
收不得師於何處明子云道什麼云想師只

有湛水之波且無滔天之浪子云閑言語師云投子古佛不可道不知若點檢來直是天地懸隔纔問便和聲打

舉洛浦久爲臨濟侍者到夾山問自遠趨風乞師一接山云目前無闍黎此間無老僧浦

便喝山云住住闍黎莫草草忽忽雲月是同溪山各異截斷天下人舌頭即不無爭教無舌人解語浦無對山便打師云者漢可悲可痛鈍致他臨濟他既雲月是同我亦溪山各異說什麼無舌人不解語坐具劈口便撼夾

山若是箇知方漢必然明窓下安排

舉三聖問雪峯透網金鱗以何爲食峯云待汝出網來向汝道聖云一千五百人善知識話頭也不識峯云老僧住持事煩師云可惜放過好與二十棒者棒一棒也饒不得直是

罕遇作家

舉伏牛爲馬祖馳書到國師處國師問馬祖有何言句示人牛云即心是佛國師云是什麼語話良久再問更有什麼言句牛云不是心不是佛不是物國師云猶較些子師代當

時便喝牛却問和尚此間如何國師云三點如流水曲似刈禾鎌師云是什麼語話也好與一撥見之不取千載難忘

舉玄沙問鏡清我不見一法爲大過惠爾道不見什麼法清指露柱云莫是不見者箇法

麼沙云浙中清水白米從爾喫佛法則未法師云大小鏡清被玄沙熱瞞我當時若見但只向道靈山授記也未到如此

舉先報慈問僧近離甚處云卧龍慈云在彼多少時云經冬過夏慈云龍門無宿客爲什麼在彼許多時云師子窟中無異獸慈云爾

試作師子吼看云若作師子吼即無和尚慈云念汝新到且放三十棒師云奇怪諸禪德

若平展則兩不相傷據令則彼此俱嶮還點檢得麼

舉船子云千尺絲綸直下垂一波纔動萬波

隨夜靜水寒魚不食滿船空載月明歸師云者漢勞而無功忽若雲門道一句合頭語萬劫繫驢橛又作麼生免此過良久云莫謂水寒魚不食如今釣得滿船歸

舉投子問巨榮禪客老僧未曾有一言半句挂諸方耳目何用要見山僧僧云到者裏不施三拜要且不甘子云出家兒得恁麼沒碑

記僧繞禪牀一巾而出子云有眼無耳孕六月火邊坐師云也不得放過纔轉便與擒住

便喝是誰不甘若跳得出不妨是一員衲僧舉祖師道六塵不惡還同正覺拄杖子是塵有甚麼過過既無應合辯主所以道糞掃堆

上現文六金身且拈在一邊赤肉團上壁立千仞又放過一著直饒八面四方正好連架

打

舉古云眼裏著沙不得耳裏著水不得忍若有箇漢信得及把得住不受人瞞祖佛言教是什麼熱枕鳴聲便請高挂鉢囊拗折拄杖管取一員無事道人又云眼裏著得須彌山

耳裏著得大海水一般漢受人商量祖佛言教如龍得水似虎靠山却須挑起鉢囊橫擔拄杖亦是一員無事道人復云恁麼也不得不恁麼也不得然後沒交涉三員無事道人中要選一人爲師

明覺禪師語錄卷第三

明覺禪師語錄卷第三

校勘記

- 一 底本，明永樂北藏本。
- 一 八七六頁上二行「參學小師允誠等編」，南作「僧錄司右闡教兼靈谷禪寺住持淨戒重校」。
- 一 八七六頁中一〇行第一六字「理」，清作「狸」。
- 一 八七七頁上四行「臨濟」，南作「林際」。下同。
- 一 八七七頁上六行第一〇字「濟」，南作「際」。
- 一 八七七頁上末行「樹云」，南無。
- 一 八七七頁中五行「起浪」，南、徑作「浪起」。
- 一 八七八頁上五行第一一字「爲」，南無。
- 一 八七九頁上末行第八字「被」，清作「彼」。
- 一 八七九頁中三行第二字「著」，清作「羞」。
- 一 八七九頁中一九行第一二字「濟」，南作「際」。下至本頁下五行首字同。
- 一 八八〇頁下五行第一六字「門」，南作「雲門」。
- 一 八八一頁下八行第六字「金」，徑作「今」。
- 一 八八二頁下一行第一五字「專」，清作「某」。
- 一 八八三頁上一二行「點檢」，徑作「檢點」。
- 一 八八三頁上一九行「靈利」，南作「劍利」。
- 一 八八三頁下三行第一五字「待」，徑作「侍」。
- 一 八八五頁上一〇行「劈口」，清作「劈扣」。又末字「夾」，清作「來」。

明覺禪師瀑泉集卷第四

綺六

參學小師圓應編

師自兩處道場多應機語句門人集之雜三已行於世斯所紀者乃垂帶自答及古今因緣朝暮提唱辭意曠嶮而學黨未喻復致之

請益師蓋不獲已隨所疑問以此以彼乍放

乍收或抑或揚或代或別近百五十則實一時之能事也況圓應忝預參承寧忘捃拾然

多聞未益誠有愧於宗師必記諸善言諒無

譏於弟子可命曰瀑泉集意以飛流無盡為

義兄知我者幸同味焉時天聖八年八月十

五日圓應序

上堂汝等諸人盡是久經陣敵慣戰作家倚

天長劔即不問你作麼生是袖裏藏鋒代云

寡不敵衆又云彼此

上堂寡不敵衆什麼人分上事代云總由和

尚又云彼此又云龍蛇易辯衲子難瞞許你

眼正頂後一相拈得也無代云收

有時云收之一字飲氣吞聲作麼生辯代云

衲子難瞞

或云傾湫倒嶽尋常之用不涉泥水道將一句來代云三千里外

示衆云三千里外還且如何代云過或云佛

未出世時一人人鼻孔遼天出世後為什麼

杳無消息代云賊不打貧兒家問僧云賊不

打貧兒家因什麼却打代云須到如此

或云祖師不到處時人知有時人不知處過

在祖師作麼生辯代云不得春風華不開

上堂云不得春風華不開箇箇道我會會即

且致作麼生舉代云時人相師又云空劫已

前徒指注空劫之後錯商量正當空劫什麼

人為主代云本是將軍致太平

有時云太平本是將軍致莫錯認定盤星我

為拈了也還會麼代云掩面出去

或云交鋒兩刃要定生死彼此無傷功勳不

立作麼生是將軍正令代云到即不點

或云到即不點還甘也無代云赤心片片

有時云釋迦老子出氣不得甚麼處誦訛代

云填溝塞壑又代云退身三步問云填溝塞

壑負恩者多甚處見老底代云香積世界

或云五千四十八卷止啼之說如今啼止也

還我黃葉來代云事不孤起

有時云事不孤起你也分一半代云哪又云

合到某甲又云單傳心印過犯彌天甚人委

悉代云須見如此

上堂須見如此著甚來由代云也是

或云善來文殊還知敗闕麼代云一箭兩槩

或云一箭兩槩為什麼却敗闕代云善來文

殊

或云乾坤崩陷且致再見天日道將一句來

代云悔不愼當初

有時云悔不愼當初便下座却問僧他後作

麼生舉代云好事不如無

有時云雄兵百萬且定邊疆劍客三千若為

驅使代云不許夜行投明須到

示衆云不許夜行投明須到何似生代云孟

常門下或云一筆勾下不甘底出來代云只

宜拄杖子

上堂云只宜拄杖子勾下屬何人代云傍觀

者

或云威音王已前無師自悟是第二句還我第一句來代云掃土而盡問僧掃土而盡你還知麼代云因誰致得

有時云三世諸佛說夢六代祖師說夢翠峯今日說夢還有夢見底麼代云掀倒禪牀

或云掀倒禪牀蓋是本分過在什麼處代云惱亂春風卒未休

或云奔流度刃也是尋常啐啄同時略請相見代云什麼處去也

上堂云什麼處去也代云日月易流又云針眼裏藏身即不問你作麼生是遊戲十方代云踞虎頭收虎尾

一日云踞虎頭收虎尾諸方未曾見代云也是

或云上來則擾擾端坐則昏昏脫灑一句作麼生道代云春無三日晴

示衆云春無三日晴去住還堪笑且問諸衲僧曬却何時了代云某甲只管看

或云有佛法處不得住無佛法處急走過趙州爲什麼摘楊華代云更事多矣問僧更事

多矣亦要商量代云莫教屈著

有時云明眼衲僧入門便話墮三十年後誰是知音代云拂袖便出

有時云拂袖便出也好與三十棒代云賊過後張弓

或云七縱八橫拈却把定乾坤眼爲什麼却有沙代云黃連未是苦

或云黃連未是苦黃檗好爲隣復問還辯得這時節麼僧云不會自代云抑已而已

或云繞天下行脚到處豈無尊宿相爲還有盡力道得底句麼代云口只堪喫飯

上堂云口只堪喫飯雲門大師拈了也你來者裏聽什麼稅鳴聲以拄杖一時打下代僧當時但近前把住拄杖云和尚今日因又云關棧子即不問上座作麼生是牛頭橫說豎說代云著甚來由

一日云著甚來由便下座代云能有幾箇有時拈起拄杖云天不能蓋地不能載復以拄杖畫一畫云百千諸佛諸代祖師盡向翠峯乞命代云官不容針

或云舉一明三爲甚不著便代云作賊人心

虛又云文殊起佛見法見貶向二鐵圍山衲僧起佛見法見列在三條椽下翠峯起佛見法見誰敢觀者代云秤尺在手

或云洞庭湖水一吸淨盡魚鼈向甚處藏身

代云咦又云喝下承當崖州萬里棒頭薦得別有條章作麼生是衲僧本分代云惡

或云虛空爲鼓須彌爲槌王老師不打還肯得諸方也無代云千年田八百主

有時云髑髏常千世界鼻孔摩觸家風拈却別致一問來代云祖師遺下又云你若龜頭

鼈頭向後道親見翠峯好代云何必上堂天不能蓋地不能載衲僧坐斷如恒河沙闌市裏指出一箇來代云便擲傍僧

或云生門易過死門難入逆順無拘底爲什麼不垂手代云收得安南又憂塞北

或云荒田不揀草變爲金信手拈來金變爲草古聖日用不知且致你爲什麼臨機道得

代云如蟲禦木

上堂云如來惟一說無二說穿却衲僧鼻孔

換却衲僧眼睛即得若教我明破恐帶累你不是好人代云欲見其師先觀弟子

或云諸佛有難炭庫裏衆生有難火燄裏你衲僧不得動著代云魯般繩墨

或云火待日熱風待月涼北斗南星句不要你道留與後人貶剝代云一言已出駟馬難追

上堂云色不異空空不異色園頭甚要古人道了也因什麼知而故犯代云爭奈轉多問

僧我道轉多你作麼生僧云某甲不會師云惱亂春風卒未休

或云本分事道我知有將錯就錯甚人承當代云不惜眉毛者

或云年來一度春也畢竟事作麼生代云藏身露影

或云至道無難惟嫌揀擇德山不在付與黃檗代云洗脚上船復問僧云我恁麼道正是

時人窠窟趙州直得五年分踈不下你何不救取僧無語師云雪峯道底

上堂云開門待知識知識不來過直得出門

相接爲什麼土曠人稀代云和尚年老

或云放憨道著藥忌即不管你死中得活致將一問來代云略無些子

上堂云遠則照近則明你會也笠子拄杖拈放一邊入水見長人作麼生辯代云平出

或云因一事長一智針筒藥袋不得失却如履輕冰道將一句來代云以已妨人又云會

則事同一家且放你過不會則東西南北付與驢年代云一日便頭白

或云今日也恁麼明日也恁麼第三第四不問你後五日事作麼生若道只恁麼代云苦

哉佛陀耶

有時云什麼劫中無祖佛你不著便猶可代云解笑底亦少或云朝堂門下難舉令雲門

道底不要代云但咳嗽一聲

一日云謀臣猛將用不著到即不點是什麼人代云不犯之令

上堂云若道得隔身句知你是箇了事人忽若總道不得我也知你親代云猛虎不食其子

一日云千兵易得一將難求上將來也三軍

在什麼處代云退後退後

或云閭內者不出閭外者不入將相雙行句作麼生道代云弔民伐罪

因普請問僧甚處來云摘茶來師云茶園裏有玄沙見底還見麼代但指露柱云和尚問

又問僧甚處來云摘茶來師云人摘茶茶摘人不問你無底籃子重多少代云慣得其便

又問僧甚處來云摘茶來云茶叢列作鼻孔茶葉是你眼睛作麼生摘代云今日不著便

一日云佛法不用學觸目皆成滯百城既未遊樓閣門長閉勸君廻首看請下一轉語自

云莫辜負人好

一日問僧南泉斬猫兒你作麼生會云有什麼難師云作麼生無語代云一刀兩段

一日遊園次問僧苦瓠連根苦甜瓜徹蒂甜明得箇什麼邊事僧無對代云平出

一日請益退侍者問訊云和尚不易師云有什麼不易無對師代云法堂上寸草不生僧便禮拜師云若不是我

師一日問僧諸方道不得底句你作麼生道
僧云天平地平云僧麼則王老師不如你僧
無語師云只道得一半

師一日見僧來師云是什麼物與麼來僧云
口痛祇對和尚不得師云鼻孔咋僧無語師

云黃連末是苦第六

師一日見二僧來拈起拄杖云與你二人分
取僧云只恐和尚不平第一僧云那上座先
到雪竇師云有功者賞

師一日見二化主城中歸問云你憑箇什麼

入城教化衆生僧云雖有好心且無好報第

二僧云禍不入慎家之門師云近火先焦

師一日晚參問僧是什麼時候也僧應諾師

便喝僧云和尚何不領話師云日勢稍晚

師一日見僧來拈起拄杖云我兩手分付你

作麼生僧退身云不敢師云為什麼棒上不

成龍僧云三十年後恐辜負和尚師放下拄

杖云咋咋

師一日問僧你見雪竇後錄末僧云見了師
云向甚處見我僧云也知和尚是川中人師

將拄杖打一下云夢見

師一日見僧出歸師云鬧市裏還見天子麼

僧無語師代云非但又云苦哉佛陀耶

一日十數僧待立次師云佛法無人說雖慧

不能了復問僧還有無師自悟底麼衆無語

師云負命者上鉤第六

師因在莊數僧侍立次師問云維摩老云步

步是道場這裏何似山裏衆下語師皆不諾

師代云只恐和尚不肯

師一日問僧你作箇什麼來僧云合靈寶丹

來師云靈即不問作麼生是寶僧云不敢祇

對和尚師不肯自代云泊與和尚答話

師一日問僧你浴未僧云某甲此生不浴師

云你不浴箇什麼僧云今日被和尚勘破

師云賊不打貧兒家

師一日同僧遊山次到開山和尚塔頭僧云

見說開山便是黃巢師云黃巢是草頭天子

爲什麼却作住山人僧云忌辰也好與他設

粥師不肯自代云賞不避仇讎

師一日同三五僧看種田師云靈苗無根作

麼生種僧云明年更有新條在師云你問我

我與你道僧便問師云分付田舍奴

師一日出城見下院山主師云既是山主爲

什麼却在城中山主無語師自云負命者上

鉤來

師一日與數僧遊山次見牯牛舉頭師問牯

牛舉頭作什麼僧云怕和尚穿却師不肯自

云看入草底

師一日燒亡僧師問僧還將得火來麼僧云

將得來師云弄假像真

師一日問僧甚處來僧云浴來師云三身中

那身浴僧云或鼓聲前或鼓聲後師云飽

叢林

師一日問僧你尋常爲什麼不上來僧云長

上來只是門閉師云爲什麼不入來僧云來

也師云賊過後張弓第六

師一日爲首座寫真師云既是首座爲什麼

却有兩箇首座云爭之不足師云你問我我

與你道首座擬問師云雪竇門下

宋太宗皇帝因事六問當時無人奏對因入

寺見僧看經問云看什麼經對云仁王經帝云既是寡人經爲甚在卿手裏師代云皇天無親唯德是輔

因入塔院問僧卿是甚人僧云塔主帝云此是寡人塔爲什麼卿作主代云蓋國咸知

因僧燒却藏經朝見告乞宣問昔日摩騰不燒如今爲什麼燒却代云陛下不忘付囑

因帝夜夢神人報云請陛下發菩提心帝至曉宣問左右街菩提心作麼生發代云實謂今古罕聞

因僧朝見帝問甚處來云卧雲來帝曰朕聞卧雲深處不朝天爲什麼却到這裏代云難逃至化

因僧朝見帝賜坐僧云陛下還記得麼帝云甚處相見來僧云靈山一別直至如今帝曰

以何爲驗僧無對代云貧道得得而來

唐憲宗迎舍利現五色光百辟俱賀惟韓愈端立帝問百僚皆賀卿爲甚不賀愈曰臣曾看經來佛光非青黃赤白等相此是神龍荷助之光帝云作麼生是佛光代云陛下高垂

天鑑

裴相公捧一尊佛像於黃壁前跪云請師安名壁云裴休師代相公當時便喝

廣南劉王請雲門入內於含春殿坐次帝令鞠常侍宣問靈樹果子熟也未門云甚年中

得信道生師代進語云猶帶酸澀在又代雲門云聖意難測又云諾諾復宣問如何是禪

云皇帝有敕臣僧對代進語云錯又代雲門云念以臣僧年邁

龍光問僧名什麼云自觀光云自觀見什麼代云有悞龍光

悟空禪師問座主講什麼經云法華經空云有說法華經處我現實塔當爲證明座主讚

請甚人證明代云私通車馬
投子示衆云汝等諸人盡道我實頭若出門

三步有人問你作麼生是投子實頭處作麼道代云疑殺天下人

有老宿見官人手中執笏乃問在官人手中爲笏在天子手中爲珪在老僧手中喚作什麼代云弄巧成拙

四祖到牛頭後庵見虎便作怕勢牛頭云和尚猶有這箇在祖云適來見什麼代云但亦作怕勢又代云泊合放過

僧問惠濟古人道得坐披衣向後自看如何是得坐披衣濟云暢我平生代云諾諾

問投子定慧等學明見佛性此理如何投子云打水用桶舀粥用杓代云爭得不問

玄沙見孚上座便云新到相看孚云已相見了也沙云什麼劫中曾相見來孚云莫瞋睡別云這賊敗也

玄沙與地藏藏在方丈說話夜深沙云侍者關隔子門汝作麼生出得地藏云喚什麼作門別云珍重便行

崇壽問僧泉眼不通被沙礙道眼不通被甚麼礙僧云眼礙別云強將下無弱兵

保福在疾問僧我與你相識年深有何名方妙藥相救僧云甚有聞說和尚不解忌口別云只恐難爲和尚

有西天聲鳴三藏到王大王處王令玄沙驗過玄沙以銅火筋擊鐵火爐問三藏云是什

麼聲云銅鐵聲沙云大王莫受外國人購師
別云大王宜加信敬又別三藏云莫瞞外國
人

國師問座主講什麼經云金剛經國師云最
初是什麼字座主云如是國師云是什麼別
云以拄杖便打

陸郎中問仰山如何是不斷煩惱而入涅槃
仰山豎拂子郎中便拜異時仰山却問郎中
曾問不斷煩惱而入涅槃老僧豎拂子郎中
作麼生會陸云據某甲見處入之一字也不

用得仰山云入之一字不為郎中師云作麼
生會云別陸云拂子到某甲手裏也又別仰
山後語云我將謂你是箇俗漢

陸大夫問南泉大悲菩薩甚處得許多手眼
來泉云如國家用大夫作什麼別云不及大
夫所問

僧問雲門十方薄伽梵一路涅槃門如何是
一路涅槃門云我道不得云和尚為什麼
道不得云你舉話即得別云淺水無魚徒勞
下釣

吳尚書訪睦州至門首便問三門俱開弟子
從何門而入睦召尚書尚書應諾睦云從信
門而入別云客是主人相師

南泉遷化陸巨大夫到院主云大夫何不哭
大夫云道得即哭長慶代云合笑不合哭別
云蒼天蒼天

雲巖遷化時道吾問離却殼漏子了後向何
處再得相見巖云向不生不滅處相見別云
喚侍者與我記取這一問

僧問法燈百骸俱潰散一物鎮長靈未審百
骸一物相去多少燈云百骸一物一物百骸
別云吾不如汝

僧問歸宗如何是佛宗云我向你道還信麼
云和尚言重爭得不信宗云只汝便是別云
侍者寮裏喫茶去

麻谷持錫到國師處振錫而立國師云汝既
如是何用見吾谷又振錫一下別云泊不到
此

妙濟於僧前書一字問云是什麼僧云不識
濟云滿口道著別云老僧罪過

僧問曹山清稅孤貧請師拯濟山云稅闍黎
應諾山云清源白家酒三盞猶道未霑唇別
云稅闍黎應諾是什麼心行

僧問玄覺先師舉不及處請和尚舉覺云聽
者須是奇人別云大眾看者一員禪客
石頭問讓大師不慕諸聖不重已靈時如何
讓云子問太高生何不向下問將來別云三
十棒教誰喫

僧問玄沙盡十方世界是一顆明珠學人為
什麼不會沙云用會作麼別云諸方即得我
這裏不得

玄沙問南際云此事惟我能知長老作麼生
會際云須知有不求如者別云雪峯門下幾
箇如斯

法眼問百法座主云百法是體用雙陳明門
是能所兼舉座主是能法座是所作麼生說
箇兼舉有老宿代云和尚喚什麼作法座別
云和尚分半院與某甲始得

睦州問座主講什麼經云涅槃經州云問大
德一段義得麼云問什麼義州以脚趂空吹

一吹云箇是什麼義云經中無此義州云朕空謾語漢此是五百力士揭石義麼老宿代云和尚瞞某甲瞞大衆別云和尚慣得其便雲門示衆云世尊生下一手指天一手指地周行七步目顧四方云天上天下唯我獨尊我當時若見一棒打殺與狗喫貴得天下太平法眼云雲門氣勢甚大要且無佛法道理老宿代云將謂無人證明別云鈞在不疑之地

巖頭雪峯欽山三人坐次洞山點茶來欽山閉眼洞云什麼處去來欽山云入定來洞云定本無門從何而入老宿代云大有人恁麼會別云當時但指巖頭雪峯云與者兩箇瞋睡漢茶喫

雲門問僧近離甚處云新羅門云將甚麼過海云草賊大敗門云你爲什麼在我手裏僧云恰是別云噓噓

雲門到洞巖得數日上叅恰見巖下來巖問什麼處去云親近去巖云亂走作什麼云暫時不在巖云什麼處去來別云好與三十棒

東平問官人風作何色無對却問僧僧提起衲衣云者箇在府下鋪平云用多少帛子別云蝦跳不出斗

雲門問曹山密密爲什麼不知有山云只爲密密所以不知有別云達磨來也

雪峯在國清拈起鉢孟問座主道得與你鉢孟主云此是化佛邊事別云只恐鈍置和尚峯當時云你作座主奴也未得主云某甲不會峯云你問我我與你道座主方禮拜峯便踏倒後座主舉似雲門云某甲得七年方見門云你得七年方見云是別云草賊敗也

道吾見雲巖掃地問云太驅驅生巖云須知有不驅驅者吾云恁麼有第二月也別云洎合放過

清峯辭雪峯問甚處去清峯云識得者漢即知去處雪云你是了事人亂走作什麼別云西天斬頭截臂清峯當時云和尚莫塗汗人好雪云我即塗汗你你道古人吹布毛作麼生清峯云殘羹餽飯已有人喫了也雪峯休去師出雪峯語云一死更不再活

韶山勘僧云莫便是多口白頭因云不敢韶云多少口云偏身是韶云大小二事向甚處出云韶山口裏別云從來疑著韶山

保福到庵主處茶話次庵主云有僧問某甲如何是祖師西來意某豎起拂子不知得不得福云某爭敢道得不得有箇問有人讚歎此事如虎帶角有人輕毀此事分毫不直一等是恁麼事爲什麼讚毀不同庵主云適來出自偶爾有老宿云毀又爭得又老宿云惜取眉毛師都別云若非和尚證明拂子一生無用

石頭大師參同契

子嘗覽斯作頗見開士皆摘辭聲極成贊厥道因亦隨興以擬之匪求蝕木於文也噫先覺洪規可洞照遐古豈復情謂逾越於其間哉蓋往往學者抑問勉意不獲而已其或金沙混流淘之汰之固必存彼匠手明矣

竺土大仙心誰是東西密相付借取人根有利鈍作麼道無南北祖且歎靈源明皎潔摩呵枝派亦未閣流注相許執事元是迷展開契理

亦非悟枯門門一切境從長回互不回互

以頭回而更相涉柱杖子不爾依位住莫錯

星盤色本殊質像開眸聲元異樂苦還同闇合

上中言心不明明清濁句掛壁四大性自復

隨行如子得其母也可知火熱風動搖自消水

濕地堅固從且眼色耳音聲海晏鼻舌鹹

醋可憑然於一一法君重依根葉分布好取明

本末須歸宗能知尊卑用其語不令當明中

有闇闇必勿以闇相遇非明當闇中有明一見

三勿以明相觀無異明闇各相對若為比如

前後步此不如萬物自有功皆爾當言用及處

縱橫事存函蓋合子細理應箭鋒拄莫教承

言須會宗非未勿自立規矩難出觸目不會

道又何運足焉知路惡不進步非近遠唱彌

迷隔山河爾和彌謹白參玄人同歸光陰莫

虛度誠哉是

真讚

禪定大師

虛凝不器有象殊域伊何郢流卓爾原極驚

峯崔嵬蟾輪乍回列剎望重勞生眼開開也

誰觀迅振高古或葉或華自三自五天子褒

稱芳禪定師而今而後芳香風吹

集賢殿學士曾侯

天石麟豈輕獻日角月角藏億萬當年文陣

獲全功不奪龍頭幾人怨

若冰大師

冰之有光非珠澄徹山之有光非玉凝潔若

冰大師殊彼清絕殊芳必羣絕芳可觀一字

根極三千頂住乍曰義龍或稱律虎相對風

規分不分金田獨步君看取

清照大師

江海秋碧鰲峯畫寒巧出匠手依依對看寶

几乍凭華巾非結以餒續話月指月古芳

今芳請試甄別

恭首座

道離微芳誰與隣貌古澹芳飛清塵巖檜蒼

蒼經幾春乳竇堂中第一人

禪徒寫予幻質復請為讚辭曰

祖佛怨芳非其師叢林害芳誰相資水枯雪

殘深索索水冷雲澹空累累寶聖錯僧絲知

人間天上爭容伊

周生強圓夢身子亦不能伏筆

上下三指彼此七馬拈華未曾微笑何也石

謂玉芳器必分水凌虛芳月非下不知誰是

傍觀者

咄者拈拮遠生瓜葛來自三川欺手兩浙指

鹿為馬將日作月罪芳彌天焉可分說

廣慧禪師

寥寥雄機落落虛宇本之不兆傳之奚取取

既有規規還倫古凝明孤寬垂應萬端海蚌

光絕天珠影殘南來北來玄眸可觀

安巖山照禪師并序

愚昔遊漢水抵廬嶽率訪叢室襲禪家流階

象馬蹴踏至於心口憤排品藻當代誠難其

師然非厚誣方來且指掌輪握何取豈斯歎

陪老作觀繪真相古之今之歎恨亡矣高深

莫究其極明晦靡盡其際故時欽依乃勉扶

稱詠庶文外之士道存而同歸者也

覺雄慧燈記飲光滅光聯不已龍昌遠絕善

續者誰梅峯之師化偃二浙聲流四維大名

無當高讓太白韜晦殊運虛明曠索歸休安
巖寒籠翠杉我笑方外華非類啣郢工筆狂
梵儀頓舉肩雲頂絲秋蟾夜渚靜應南軒芳
相對時空生未解方聞斯語開眸凝瞻迅雷
不及捨耳

續六

明覺禪師瀑泉集卷第四

明覺禪師瀑泉集卷第四

校勘記

- 一 底本，明永樂北藏本。
- 一 八八七頁上一行書名，南作「明覺禪師語錄卷第四」。卷末書名同。

一 八八七頁上二行「參學小師圓應編」，南作「僧錄司右闡教兼靈谷禪寺住持淨戒重校」。

一 八八七頁上三行首字至一二行末字「師……序」，南無。

一 八八七頁中四行第五字「一」，清無。又第一〇字「遠」，清作「撩」。

一 八八七頁中一〇行第二字「致」，南作「止」。

一 八八七頁下一六行末字至次行首字「孟常」，清作「孟嘗」。

一 八八八頁下一三行第一六字「恒」，南無。

一 八八九頁中八行「放你過」，南作「放過你」。

一 八八九頁下一七行第八字「僧」，南無。

一 八九〇頁中三行末字「耶」，徑無。

一 八九〇頁中四行「待立」，南、清作「侍立」。

一 八九〇頁下一一行末字「中」，南無。

一 八九〇頁下末行首字「宋」，南作「巨宋」。

一 八九〇頁上一行末字至次行首字「帝云」，南無。

一 八九一頁下一一行「與地藏藏在方丈」，南作「在方丈與地藏」。

一 八九二頁中五行末字至六行首字「別云」，南無。

一 八九三頁中一二行「驅驅」，清作「區區」。一三行同。

一 八九四頁上五行「火熱」，徑作「火日」。

一 八九四頁上一九行「郢流」，徑作「逞流」。

一 八九四頁下五行末字「者」下，南有「又」字。

一 八九四頁下一八行第三字「庶」，南作「覩」。

明覺禪師祖英集卷第五

詩七

參學小師文政編

師之形言也且異乎陽春白雪碧雲清風者也夫大圭不琢貴乎夫真至言不文尚於理實乃世之衡鑑豈智識而擬議哉師自戾止翠峯雪竇或先德言句淵密師因而頌之或感興懷別貽贈之作固亦多矣其有好道者並錄而囊之一日總緝成二百二十首乃寫呈師師曰余偶興而作寧存于本不許行焉禪者應曰乃祖闡千載之芳烈也勿輕舍諸師察其慤志勉弗獲已抑而從之文政幸侍座机輒述序引用識歲時炎宋天聖十年孟陬月文政謹序

偈頌

送寶相長老并序

大師歡禪德將赴丹立辟命光闡宗乘蓋時應必行固不可抑留者也且撫會之作肇曠絕之道雖一凝一流一彼一此又何間然率織蕪辭以代贖別

奧域靈區存物外獨標台嶺為絕巖掩勝潛

奇列作屏堆青寫碧深如黛彤霞暖影生巖壁香桂茂陰籠蘚石赤松子也浪虛閑白道猷兮大輕擲曹溪有叟歸其中風從虎兮雲從龍乘興正值二三月坐斷還依千萬峯華飛飛日遲遲清飈颼颼吹無時玲瓏八面自回合峭峻一方誰敢窺窺來須得乾坤眼照古騰今謂非間若能此去副全提開發人天有何限

送法海長老

常愛裴相國式芳塵斷際高風慕要倫擬欲事師為弟子不知將法付何人常愛李相國垂列星藥嶠深源宅性靈我來問道無餘說雲在青天水在瓶緬想當時二台輔出鎮藩維訪諸祖寥寥浮幻輕百年落落宏規照千古今聞仙都賢太守入政褰帷聲浩浩英佐一一分化條文經武緯亦難討遠遠騰函飛乳峯選關士兮恢吾宗覲夜光非震滄海聆正音豈玩焦桐徒誇麟龍自西自東應排困象得象必須覺雄讓雄今既塞請還也奇別茫茫普熱紛紛下雪倒流四河載發枯林卷

舒立方外乾坤縱橫掛域中日月黃頭碧眼知未知去去憑誰繼清絕

送文政禪者

古有焦桐音聽寡不在彈古有陽春曲和寡不在言言兮牙齒寒未極離微根彈兮歲月闌未盡昇沉源少林幾坐華木落庾嶺獨行天地寬因笑仲尼溫伯雪傾蓋同途不同轍麟兮鳳兮安可論許兮巢兮復何說秋光澄澄蟾印水秋風蕭蕭葉初墜送君高蹈誰不知如曰不知則為貴

送昭敏首座

君不見鷲峯勝集百萬茫茫等閑過壞衲之外皆清凈君又不見熊嶺孤運歲月索索艱難生深雪之中有一箇宛轉流落千餘年危分嶮布空平闡辯龍蛇兮眼何正擒虎兇兮機不全石窓四顧滄溟窄寥寥不許白雲白掣斷金鎖天麒麟高舉鐵鞭擊三百猶輕舍爭知也別有七星光闡射風前把欲贈行人將報不平繞天下

送知白禪者

松不直棘不曲誰笑下和三獻玉經天緯地
太無端邁古超今亦輕觸靡羈束何必云素
範還還真規復復梅檀葉落香風清千里萬
里長相逐

送勝因長老

黃梅散席三百載續然聯芳事空在宗兮派
兮生異端華兮葉兮太煩碎韶陽間出多慷
慨權要英雄曾絕待曲木據位知幾何利刀
剪却令人愛近還有箇披老衲楚甸橫身風
颭颭鐵作一尋非等閑壁立千仞須摧踏報

君知江南江北徒纍纍轉海運兮織鱗片
甲雷奔電驅兮寸毫尺釐斯言勿謂存規矩
平不留兮險非取周行獨立如便休誰振宏
綱照千古

送重郢禪者

春雨如膏春雲如鶴忽此忽彼乍休乍作枯
茅離離維風太遲幽石片片遼空亦危一華
開五葉兮不相似獨孤明兮還自知還自知
歷魏遊梁徒爾爲

送僧歸靈隱

因囑白雲無籍

白雲無籍冷淡清奇雪格未可鶴態還卑垂
天沃日兮似結不結爲雨從龍兮後期必期
噫悠悠忽爾春風吹南北東西唯我知誰知
菡萏峯前布影時

送僧之石梁

萬卉流芳不知春力巖畔澗底感紅皺碧乘
興復誰同孤蹤遠僻敵君不見五百聖者導
雄機靈峯晦育深無極寒山老寒山老隨沉
跡迢迢此去須尋覓華落華開獨望時記取
白雲抱幽石

送師旻禪者

深巖寂寂披蘭芷碧霧紅霞映流水空生別
我期末期絕域殊方擬輕擬堪笑歸嶺南奔
馳何鄙彼危急亂拋下盡云提不起伊予本
自不將來相送奚憑掛唇齒旻禪客旻禪客

師子子應須落落存終始君不見古人有言
兮撲碎驪龍明珠大丈夫到如此行行不
用頻彈指

寄白雲長老

八絃雲靜明寥沉夜永松堂對寒月凋殘片

葉墜虛庭冷寂何人立深雪因憶錢唐郢禪
者十載巖栖曾未下分飛誰謂絕相同遠念
冥冥欲奚寫忽聞赴請之仙都聲光藹藹登
清途軌云天驥驟方外自笑大鵬離海隅乾
坤窄乾坤窄湛盧潛射斗牛白茫茫無限未

歸人到必爲時除點額

送智暹首座

雲蘿杳杳藏巖曲碧壘清飛冷相促瘦藤輕
袖休便休短筇殘芳續何續禪家本自冥
絆洲渚園林曾不憚十影神駒立海涯五色
祥麟步天岸君看取君看取地茫茫有誰
舉甌甌頰磨如未回爲吾深憶盧公語

送善暹首座

名之基實之蒂深兮固兮宛相繼古之名也
在希聲今之實也同浮瞿子州善卷之流也
堯驅舜馳讓無暇歸去來兮歸不歸到頭未
出冥冥者吾徒孰謂標奇絕動靜憑君試說
別葉零零兮秋暮半凋華片片兮春暖齊發
暹禪老暹禪老意曾高曠排沽待忽致譏褒
天人列請兮屢輕笑袒佛位卑兮還擬逃我

恐逃之逃不得大方無外皆充塞茫茫擾擾
知何極八面香風惹衣袂

送僧

吳山碧楚江碧吳楚悠悠興何極一尋寒木
自為隣三事秋雲更誰識乾坤不是無知己

玉石休云辨真偽待時沽譽漫淪生晦跡韜
光亦何意春風急春風急八駿奔馳追不及

南北東西把定時為君直上孤峯立龜氣分
枝北獨

古有誠
之言也

頌藥山師子話送僧

兀翹金毛師子子梅檀林下青莎裏置也置

也威自全一出六出眉剔起非擬擬知幾幾
星流不問三千里天外風清唳吼時為君吸

盡西江水吐

送秀大師

巖竇宵寒擁山帔月高古木霜禽睡西庵禪

者來扣門別我凌晨下層翠欲留不可留寫
意不及意屈眴迢迢安足云華偈聯聯太容

易君不見劉陽叟絕希冀送人只道無他事
行行會有知音知何必清風動天地

送廣華嚴歸鷲峯

海山孤僻非蓬島霧冷雲深松桂老有客凝

冬何太高巨野宵征苦相討巖房杳杳凌寒

空冰霜落落分譚叢誰云百城沉古月自笑

八面生清風依然別我還歸去惠理之徒望

回馭重重無盡樓閣門到必為時略輕據

送遠塵禪者

衲卷殘雲風高絕鄰倚天照雪堪抗要津八

紘極目兮春山若黛九野縱步兮汀草如茵

三十四老未輕識凜然方外奚相親

送德隆山主

霜葉凋殘巖風凜寒彼之禪老忽下崇巖衲

有雲兮曾卷未卷琴無絃兮解彈不彈迢迢

既行宜聽斯語明閻路岐生死洲渚而今而

後知不知類網委地憑誰舉

送澄禪者

春色依依襲爾原草春風浩浩拂我窻牖念

此分飛贈無瓊玖片片亂飄巖上梅條條縱

舞溪邊柳澄禪澄禪聽斯言古也今也行路

難知之者石火星流未急不知者龍驥步驟

魯寬看看孰云平地起波瀾

送惠儔禪者

少林風規何大瀟灑籠古罩今睥真睨假誰

云發機射虎自笑品類觀馬劍客茫茫不要

呈觀人往往須擒下儔禪儔禪崢嶸象駕

送惠文禪者

正法眼絕塵沙二三四七水月空華千燈續

燄曾間五葉分披未飽君不見卷席百丈掩

耳丹霞龍行虎步爭孤立盡同雲雨去無涯

文禪文禪騰煥吾家

送道成禪者

曹溪流非止水一點忽來千波自起直須釣

鼈釣鯨莫問得皮得髓君不見石頭有言兮

聖不慕他靈不在已成禪成禪誰家之子

送清演禪者

我年老大心力衰微贈別無語冥同振飛因

思古之送人有言吾不知其殊途同歸獨愛

新豐曲騰清輝寸草不生千萬里出門春色

共依依

送繼寶禪者

寶非寶日杲杲上上機無處討赤水求來何
太狂荆山覓得苦相惱不惱不狂排夜光陰
惡道中為津梁

送小師元楚

道之冥機一何相守汝競光陰我親蒲柳毋

厚弁之奪席毋薄愚之誦箒深思彼伐木丁

丁之聲照古照今兮宜善求友

送清果禪者

春雨濛濛春風颼颼動兮靜兮匪待時出雲

霞閑澹作性金鐵冷落為骨知我者謂我高

蹈世表不知我者謂我下視塵窟道恣隨方

情融羈鎖紫栗一尋青山萬朵行行思古人

之言無可不可南北東西但唯我

酬行齋長老

黃金為骨松為姿道高曾鄙天人師有言遺

我千古奇無人知石虎吞却木羊兒

至人不器

誰當機舉不賺亦還稀摧殘峭峻銷燦玄微

重關曾巨關作者未同歸玉兔乍圓乍闕金

鳥似飛不飛盧老不知何處去白雲流水共

依依

因事示衆

石本落落玉自碌碌古之今之一何警速師

子不咬麒麟猛虎不食伏肉君不見洞庭孤

島煙浪深木馬追風有人識

日暮遊東澗五首

極目生晚照溪雲偶成朵大朴曾未分青山

自唯我

極目生晚照遠樹籠微陰誰知清淺流別有

滄海深

極目生晚照幽情眷蘭芷白蘋葉裏風不在

秋江起

極目生晚照步影何遲遲歸禽古木中相對

頻相窺

極目生晚照蓬萊匪仙境釣得十二鼈重來

謝孤影

思歸引三首

一住翠峯頂兩見溪草綠不知朝市間幾番

生榮辱蕭條巖上雲冷淡水邊竹報誰歸去

來向此空踟躕

常憶在廬山隨時寄瓶錫五百與一千聚頭

同遣日猿攀影未回鶴望情還夫教他王老

師癡鈍無處覓

時雨灑如膏萬卉皆滋益枯根甘自休也似

春無力耕夫曉尚眠蠶婦夜多息從茲家業

荒共落風塵跡

送蘊歡禪者西上

金關路曾遙行行值開泰石房雲未開杳杳

若相待高蹤逾履水何人不傾蓋早晚承帝

恩再卜林泉會

送僧

春雲情既高片段飛虛碧去留機未消今古

望還積澄澄天影回杳杳地形直別夜共相

思誰栖此泉石

法爾不爾

夏雲多奇峯乾城冷相映借問諸禪僧那箇

堪憑定乾城高鎖月夏雲欲為雨若謂非全

功子細看規矩

送諸方化主

空巖暖律回極目望還普數點方外雲幾處

人間雨寥寥滄海月依依少林祖去必示勞
生清風立千古

劉禹端公問雲居雨從何來東平問官人風
作何色

雨從何來風作何色龍門萬仞曾留宿客進
退相將誰遭點額

風作何色雨從何來不用彈指樓閣門開波
波稜稜南方未回

送僧
松風清未休水月淡相對去來非等閑必許

孤雲會

頌雲門九九八十一二首

三三九九八十一一觀風隨召出千古有
誰同共知一毛師子衆毛畢

九九八十一大勳不豎賞若謂無請訛金剛

曾合掌

烏龍和尚

空巖清夜坐薛徑積深雪瞑目思古人徹曙
落殘月童敲石磬寒猿掛枯枝折杳杳無限
情分明向誰說

秋日送僧

邊鴈影邪寒蟬聲速乘時毳流遠別巖谷林
驚一葉兮微風觸袖水肅百川兮片月在目
因憶象骨老師曾送人行行不謂抽金鏃
早參示衆

曉天雲靜濃霜白千峯萬峯鎖寒色驪龍失
珠知不知無限平人遭點額

春風辭寄武威石秘校

春風何蕭蕭和雨復兼雪折華功未深偃草
勢曾烈毗城癡愛老怯寒對清拙裏巖影響

士難御同孤劣鼇峯人不來柴門亦休閉松

頭栗鼠下時把藤牀嚙庭際霜禽歸屢啄苔
錢闕一旦春風息暖日生林樾幽徑磐石上

拄筇行且歇無絃兮莫彈有語兮存舌冷落
流水聲古之若為說凋殘早梅樹今之若為

別俯仰身力輕翻憶春風切為吾吹却塵欲
革分歧轍為吾吹却雲欲問遼空月不知天

地間堪為誰交結

送百丈專使

大雄孤頂曾遐舉徧索諸方誰敢拒乳竇峯

前將虎鬚再得完全又歸去

送清素禪者之金華

古策風高瓶浪闊春雲片段分清絕金盃後
夜孤頂寒去去誰同落殘月

擬寒山送僧

擇木有靈禽寒空寄羽翼不止蓬萊山冥冥

去何極

送如香大師

梅檀葉落雨初歇天外風清亦何別後夜蓮
城溪月寒孤光誰共倚寒沈

寄于秘丞二首

石徑通巖竇引步藏歌側蓬萊人不來掃盡
蒼苔色

飛瀑千萬層五月狀冰雪將期雲霧開永夜
對孤月

再成古詩

霜華一鑷中玉童摘未摘斯言如不聞千古
動愁色因憶商山吟在鳥不在白

答當生不生

咄咄休強名芻狗亦為累寂寥金粟身曾未

求諸己

戲靠安巖呈雙溪大師

陝府鐵斗却知有春秋幾幾成過客一身還
作二如來黑白不分辯香臭

疏黑白無從

天地不仁萬化蠢蠢若謂非緣竹何從筍髮

兮髮兮黑白是準

暮冬感懷寄瑞巖禪師

雪水繞松檻遲遲結清淺病眼時懶開幽情
況難遣故人久相別飛文屢慚覲仰謝十二

峯分照月如翦

送知久禪者

霜竹凝寒携九節銅瓶浪鎖千溪月天上人
間不自知行行誰共分靖絕

送慶頽禪者

巖桂風清香露滴定起高秋映虛碧斷雲不
是歸帝鄉飛落人間有誰識

春日懷古四首

門外春將半巖水暖有聲玄沙曾未到虛得
偃溪名

門外春將半青青野色分桃華開欲盡無處
覓靈雲

門外春將半羣芳闌盛時鄰家有庭栢諸祖
共相知

門外春將半幽禽語共新寶陀巖上客應笑
未歸人

送僧之金陵

勝遊生末跡杳自狎時羣卷袖消寒木揚帆
寄斷雲曙瓶華外汲午磬浪邊聞別後石城
月依依遠共分

送僧

知方流古意雲樹別諸鄰月不澄微水山應
立是塵靜空孤鷲遠高柳一蟬新欲究勞生
問歸思莫厭頻
千里不來

不見古君子因循又隔秋浮生多自擲好事
更誰留碧嶽高沉月寒雲靜鎖樓宗雷何處
是白鳥下汀洲

僧歸雪上

海國浮輕棹悠悠興未闌草隨春岸綠風倚

夜濤寒沙鷺宜相狎霜蟾望更寬河聲西聽
日誰得共雲端

春晴野步

乘興携多士遲遲傍水濱春山不在目啼鳥
共誰聞片石寒籠薜蘿華冷襯雲只應融老

輩庵際境猶分

賦瑞雪送穆大師

五六皆名出飄華獨見稀若教同一色還似
負羣機玉馬猶空說銅駝轉更非爭如千萬
里相對共依依

送鐵佛專使

荷策來尋我泛舟思舊山不知何處月相照
在深灣風助秋濤急雲兼野樹閑到時如請
益先憶趙州關

同于秘丞賦瀑泉

大禹不知鑿來源亦自成色應鄰衆白聲合
讓孤清遠勢曾吞海飛流未噴鯨靈槎如可
泛天派問歸程

送簡能禪者歸仙都

荷策下丹嶂紛紛雪正飛浮生誰未到舊國

自重歸雲背猿聲斷天遙鷓影微蓮城古風
月又得振清機

天竺送僧

雪霽蓮峯頂孤禪起石牀向時機自絕異域
路空長啼猶衝寒影歸鴻見斷行後期無定

跡煙水共茫茫

寄石秘校

重林冥坐久引望復遲遲煩暑未消日涼風
來幾時天雲飛積火巖溜散垂絲欲擬相尋
去浮生已共知

因事示衆

客從遠方來遺我徑寸璧中有四箇字字字
無人識清涵鯨海寬冷射蟾輪窄今朝呈似
看請道末後句

靜而善應二首

靚面相見不在多端龍蛇易辯衲子難瞞金
槌影動寶劍光寒直下來也急著眼看

對揚殊特本同參誰自遼空強指南今古不
存師弟子一輪秋月印寒潭

自誨

麟龍不為瑞草木生光輝三尺一丈六且同
携手歸慚爾舊世師巍巍何巍巍

宗門三印三首

印空印水印泥炳然字義還迷黃頭大士不
識敢問誰得親提

印泥印空印水而地寒濤競起其中無限鱗

龍幾處爭求出背

印水印泥印空衲子不辨西東撥開向上一

竅千聖齊立下風

華轍二門四首

劫火曾洞然木人淚先落可憐傳大士處處

失樓閣

德雲閑古錐幾下妙峯頂喚他癡聖人擔雪

共填井

祖佛未生前已震塗毒鼓如今誰樂聞請試

分回互

宛轉復宛轉真金休百鍊喪却毗耶離無人

解看箭

擬弋者慕

翠羽立高枝危巢對落暉碧潭千萬丈直下

取魚歸

透法身句二首

潦倒雲門泛鐵船江南江北競頭看可憐無
限垂釣者隨例茫茫失釣竿

一葉飄空便見秋法身須透開啾啾明年更

有新條在惱亂春風卒未休

靈隱小叅

六合茫茫竟不知靈山經夏是便宜虛堂夜
靜無餘事留得禪僧立片時

因雪示衆

清光歆月不相饒堆積虛庭卒未消為瑞為
祥也難得不知誰解立齊腰

祕魔巖

把斷重津過者難擎杖須信觸髅乾霍山到
後知端的同死同生未足觀

保福四謾人

竿木隨身老作家逢場作戲更難加謾人謾
我無人會水長船高眼裏沙

靈雲和尚

本無迷悟數如麻獨許靈雲是作家借問徧

參諸祖客不知何處見桃華

僧問緣生義

義列緣生笑未聞孰呈布鼓向雷門金剛鐵

券諸方問報道三千海嶽昏

名實無當

玉轉珠回祖佛言精通猶是汙心田老盧只

解長春米何得黃梅萬古傳

迷悟相返

霏霏梅雨灑危層五月山房冷似冰莫謂乾

坤乖大信未明心地是炎蒸

道貴如愚

雨過雲凝曉半開數峯如畫碧崔嵬空生不

解巖中坐惹得天華動地來

大功不宰

牛頭峯頂鎖重雲獨坐寥寥寄此身百鳥不

來春又過不知誰是到庵人

晦跡自貽

圖畫當年愛洞庭波心七十二峯青如今高

卧思前事添得盧公倚石屏

五老師子

踞地磐空勢未休爪牙何必競時流天教生

在千峯上不得雲擎也出頭

與時寡合

居士門高謁未期閑隈巖石且相宜太湖三

萬六千頃月在清波說向誰

宜謙山主赴鄆城命

休向千峯過好時白雲高卧趣還早塗中無

限未歸客不待相依更待誰

庭前栢樹子二首

七百甲子老禪和安貼家邦若是他人問西

來指庭栢却令天下動干戈

千聖靈機不易親龍生龍子莫因循趙州奪

得連城壁秦主相如總喪身

贈琴僧

太古清音發指端月當松頂夜堂寒悲風流

水多嗚咽不聽希聲不用彈

送僧

帆掛澄江雨霽時綠鋪春岸草離離定乾坤

句輕相送逢著知音舉向伊

送僧之婺城二首

孤雲徒自類行蹤高指金華思不窮日暮輕

帆映秋色沙禽啼斷一江風

婺溪煙景稱生涯輕泛蘭舟意未賒八詠清

風好相繼碧雲流水是詩家

送文用庵主歸舊隱

太白峯前舊隱基杉松寒翠滴無時經年拋

却又歸去再聽巖猿只自知

送顯冲禪者之雪上觀兄著作

選佛選官應在我難兄難弟不唯他汀華岸

草芳菲日遠遠清風爭奈何

送實月禪者之天台

春風吹斷海山雲別夜寥寥絕四隣月在石

橋更無月不知誰是月邊人

玄沙和尚

本是釣魚船上客偶除鬚髮著袈裟祖佛位

中留不得夜來依舊宿蘆華

偶作

拾翠尋芳烈夜燈蘆芽穿膝笑無能飛泉冷

淡與誰聽空落斷崖千萬層

送僧

路岐長草帶青青雲片相兼野思生多謝春風莫吹散等閑爲蓋贈君行

送純禪者

莎蘿雨滴蒼苔痕前峯後峯啼斷猿携筇別我下層翠何處靜敲仁者門

和頑書記見寄

古松吟繞石磷磷湯惠休辭豈易聞紅葉寫成藏不得暮風吹斷碧溪雲

送允誠侍者

飛泉列岫壓窮野冷碧寒青光闢射片雲片

石何太高爲誰留在長松下

送僧

古藤枝寒索索方倚靠又拈却海關天選非等閑風前曾共孤雲約

送清禪者

瘦藤春雲深天涯去無侶時笑野泉聲似共流鶯語落落風規今古情相逢會有知音舉

辭于秘丞

永夜潛思槁木身蓬仙門館漸經旬雖干清政爲高客爭奈白雲無主人巖瀉瀑泉機未

息雨零寒葉夢猶頻此時賢宰容歸去古像焚檀祝有因

送僧

涼飈新葉墜巖陰禪起高秋別翠峯孤月冷光清有興斷雲閑影合無心瓶分吳浪情何

極鉢化膺門道更深好是却迴舊房日倚欄

同看橋鋪金

往復無間十二首

平旦寅眠兆之前已喪真老胡鶴樹漸開口猶舉雙趺誑後人

日出卯萬國香華競頭走邯鄲學步笑傍觀

豈知凶禍逐其後

食時辰大嚮那堪列主賓維摩香飯本非設怪他鷲鷲獨生瞋

禺中已荆棘園林徧大地南北東西卒未休

金剛跋復從何起

日南午寥廓騰輝示天鼓鬱頭藍已定全身

何假周行誇七步

日昃未碧眼胡來欺漢地九年計較不能成

剛有癡人求斷臂

晴時申急急逃生路上人草鞋踏盡家鄉遠頂罩燒鍾一萬斤

日入酉室內覆盆且依舊塵塵彼彼丈夫兒

井中之物同哮吼

黃昏戌裏中不礙平人出瓦礫光生珠玉闕

將軍豈用驅邊卒

人定亥六合茫茫誰不在長空有月自尋常

霧起雲騰也奇怪

半夜子樵唱漁歌聲未已雨華徒說問空生

高枕千門睡方美

雞鳴丑貴賤尊卑各相守忙者忙兮閑者閑

古今休論自長久

送僧

巖泉高鎖黃金宅衲卷秋雲古標格離歌誰

贈欲行人徧界同爲一宿客春色依依日杲

杲南北東西好看好鬧市揆笑嬌尸迦草頭

青點俱胝老呵呵人間天上不知他羈竭

節有頂門眼歸去清風拂薜蘿

寄李都尉

水月拈來作者殊東西南北謾區區也知金

粟李居士端坐重城笑老盧^吐

寄池陽曾學士

山萬重兮水萬枝堆青流碧冷便宜算來免
得生遙恨不在詩情在祖師

寄四明使君沈祠部^{二首}

露冕民謠物物成江山千里古風清曹溪客
是無機者日在深雲聽頌聲

蒼蒼德也亦如斯政化全歸副倚毗十萬人
家寫春色不知誰解立生祠

寄內侍太保^{二首}

千尺巖泉噴冷聲草堂雲淡竹風清蒲團時
倚無他事未日寥寥謝太平

蘿龕薛室狎猿猴忽捧綸言掛紫袍恩大不
知何以報五雲天上望空勞

寄曹都護

故國休言萬里程為官為釋且分明道存不
必曾傾蓋俱有清風巾地生

送僧

虎角深藏不待時全機曾許雪林知如今百
越拈來也草偃風行是信旗

寄靈隱惠明禪師^{二首}

千峯影裏葉初凋極望還將慰寂寥也謂毫
端不相隔秋雲秋水奈遙遙

海嶠生片雲有時忽如蓋不掛飛來峯悠悠
擬何待

送益書記之雪水

白蘋汀是舊家鄉歸興蘭舟泛渺茫日暮沙
禽啼欲斷不知誰在碧雲房

明覺禪師祖英集卷第五

明覺禪師祖英集卷第五

校勘記

一 底本，明永樂北藏本。

一 八九六頁上一行書名，^南作「明覺禪師語錄卷第五」。卷末書名同。

一 八九六頁上二行「參學小師文政編」，^南作「僧錄司右闡教兼靈谷禪寺住持淨戒重校」。

一 八九六頁上三行首字至一三行末字「師……序」，^南無。

一 八九七頁上一九行與末行之間，^南有七言詩四首「送僧四首 乘興飛帆別翠峯水光春靜冷涵空到人若問曹溪意祇報盧能在下風 禪石飛流濺碧莎利生還喜下雲坡途中若立三千客別起眉毛不在多 梅檀林裏振金毛四顧清風拂幾遭曾許全威作雲雨不知何處是塵勞 雲衣輕拂下層巒松檜生風觸袖寒誰問親游乳峯意百千年後與誰看」。

- 一 八九九頁下二行第一三字「夫」，
〔南、徑、清〕作「失」。
- 一 九〇〇頁中九行第一一字「折」，
〔徑〕作「折」。
- 一 九〇〇頁下一八行第一一字「不」，
〔南〕作「如」。
- 一 九〇一頁上一四行第一〇字「靖」，
〔南、徑〕作「清」。
- 一 九〇三頁上七行第三字「春」，〔南、
徑、清〕作「春」。
- 一 九〇四頁上一二行「送僧」，〔南〕作
「送僧」。
- 一 九〇四頁中四行第一四字「岑」，
〔南〕作「岑」；〔徑〕作「今」。

明覺禪師祖英集卷第六

詩八

參學小師文政編

三寶讚并序

子天禧中寓跡靈隱與寶真禪者為友或遊或處固以道義相揖投報相襲泠泠然自樂

天常之性也一日真公謂子曰愚近偶作三寶讚三十韻宜請廣唱因披閱加歎率爾而繼之類蝕木也俄屬分飛吳楚將二十載殊不復記憶真公不以事曠誠隔遠速附僧如衍而至再窺荒斐愧慰多集且夫聖人之立言也必睽虛必冥奧使文外之士同振古風垂千萬世又焉知來者及之不及道在其中也斯之讚辭曾不沾不待但退仰覺皇宗致禪徒告而行之得不曲為序引

佛寶

甘蔗流苗應刹塵覺場高發利生因紫金蓮捧千輪足白玉毫飛萬德身孤立大方資定慧等觀含類捨怨親揆星相好中天主巾地名聞出世人螺髮右旋仙島碧月眉斜印海門新鸞翔鳳舞非殊品象轉龍蟠絕比倫瓔

珞聚中騰瑞色華鬢影裏奪芳春慈儀戀望知何極梵德言辭莫可陳肯字香分無量義頂珠常照百由旬雙林孰謂歸圓寂坐斷乾坤日見真

法寶

後得智生功德聚大悲留演潤禽魚貫華雖自科千品標月還歸理一如過量劫應期廣布利那心合未忘書四衢道內拋紅燄五欲波中綻白蕖排斥眾魔登壽域引携諸子上安車義天星象熒熒也辭海波瀾浩浩歎違背此恩難拯拔遭逢末世豈躊躇聞來半偈須相敬惜去全身莫共居飛辯恨曾虧激問願幽欣且免長嘘生頂奉輝心鏡廓照塵勞信有餘

僧寶

方袍圓頂義何宣續燄千燈豈小綠華雨座前猶滯相虎馴庵畔尚稽詮巖棲塚宿難依望鶴貌雲心迥灑然寶杖夜鳴寒嶠月銅瓶秋漱碧潭煙名標鍊若澄諠猾跡念昏衢警睡眠林下雅為方外客人間堪作火中蓮情

高不是超三際道在非同入四禪浮世勉誰知逝水深峯甘自聽飛泉苾芻草韻僧祇後玳瑁孟傳古佛先珍重覺皇有真子坤維高步列金田

夏寄辯禪者山房

枕簟雲作井必固黃金宅軒窓月為畫豈止虛生白麟龍愧頭角鵬鷲慚羽翮庶擬羣類心在寬如在窄

和錢太博見寄覓山藥二首

文柄誰持合自持憂民風槩乍清羸禪林草藥如為效願見皇家急詔時

聖君鴻業在扶持日角龍章固不羸攜藻玉堂歸未晚百華開赴御筵時

送錢太博應賢良選

賢才當召試彪炳對吾君千古不遺恨八元應主文岸華明列旆天籟拂微雲後夜觀垂象中台位已分

答天童新和尚

中峯深且寒敢接海邊高松凋不死枝華拚未萌草飛瀑吼蛟宮幽徑分鳥道伊余空寂

徒浮光寄枯槁冥遊天地間誰可尋討孤
立雲霞外誰可長保茲來仁者來還稱太
白老荷策扣巖扃重席展懷抱示我商頌清
休誇郢歌好報投慚抒辭難以論嘉藻
和頌

玲瓏巖古寺冠乎明越境海眼通冽泉天心
聳危嶺嘗遊興未闌遐想神忽凝彼士真覺
雄相鄰不孤迥吾愛濟橫流孰云煩慮屏吾
愛整頽綱豈止浮根靜棲梧瑞九苞追風駿
十影顧我不爭衡與誰開闢若乘時既磊落

照世非昏瞑佇為王者師三千統摩頂

贈別太臻禪者

武陵山水何祕邃元化功不可容易壇曾善
卷韜龍光洞亦桃華副麟趾仍思昔日吾祖
浩浩提綱宗消息曠斷寰宇空又聞高大舜
讓公器祥瑞却生蘆葦叢人由境兮冥道德
境有人兮分玉石臻禪本自偃殊方忽向其
中誕孤跡迢迢海甸來尋我一十二年同冷
坐羽翼搏風今是時拂盡天雲乃飛過
雲門俱字

百草頭何太極重與禪徒下錐刺雲門俱字
好參詳雪峯輓毬亦端的黛非青兮藍一色
辰錦砂兮敢言赤紫羅帳裏有真珠曹溪路
上生荆棘還會麼此時若不究根源直向當
來問彌勒

僧問四賓主因而有頌頌之

如何是賓中賓云滿面埃塵又曰噫

頌

賓中之賓少喜多瞋丈夫壯志當付何人

如何是賓中主云兆分其五又曰引

頌

賓中之主玄沙猛虎半合半開唯自相許

如何是主中賓云月帶重輪又曰收

頌

主中之賓温故知新互換相照師子頻呻

如何是主中主云大千捏聚又曰揭

頌

主中之主正令齊舉長劔倚天誰敢當禦

都頌

賓主分不分顛顛絕異聞解布勞生手寄言

來白雲

令僧把袖

七八既難直須教透來不在前去不在後羸
細自看緊緩相就一日圓成呈似君想得諸
方未知有

送知一入京兼簡清河從事

六月千江水似秋片帆高掛岸雲收行行莫
謂朝天關况倚文星在巨舟

送德珉山主

溪山春色映雲袍愛住隍城意轉高翻笑忘
機自安者不能垂手入塵勞

送僧二首

紅芍藥邊方舞蝶碧梧桐裏正啼鶯離亭不
折依依柳况有春山送又迎

祖域高親日未央家林歸去意何長舊文不
識初相見曾振滄溟奪夜光

送崇已闍黎歸天台

石橋雲瀑冷相侵薛徑羅龕入更深却羨搢
笏遠歸去半千尊者足知音

送遠悟上人之會稽

送遠悟上人之會稽

送遠悟上人之會稽

送遠悟上人之會稽

送遠悟上人之會稽

送遠悟上人之會稽

送遠悟上人之會稽

百越江山冠九州如屏還媿謾相褒惠休此
去多吟賞贏得清風價轉高

送僧四首

乘輿飛帆別翠峯水光春靜冷涵空到人若
問曹溪意只報盧能在下風

禪石飛流濺碧莎利生還喜下雲坡途中若
立三千客剔起眉毛不在多

梅檀林裏振金毛四顧清風拂幾遭曾許全
威作雲雨不知何處是塵勞

雲衣輕拂下層巒松檜生風觸袖寒誰問親
遊乳峯意百千年後與誰看

寄員外黃君

碧岫層層列杳冥漣漪環繞貢寒青鶴藏未
識古君子空仰嘉聲過洞庭

送僧

五色祥麟白月輪乘時應不念離羣松根石
上未歸日誰看暮山飛斷雲

寄劉秀才

遠遠飛來一幅書愈風誠重復何如相逢相
見未期日目斷千山插太虛

送僧

古之別今之別目對春江倚家沈三樹兩樹
啼斷猿千峯萬峯落殘雪華濛濛雨濛濛坤

維步步生清風

聞百舌鳥送僧

曾來芳樹幾回飛煙靄初晴又見伊巧語向
人莫相笑知音知後更誰知

送中座主人入廣

船主船中寄惠持雲霞無跡共依依海山見
說多嘉賞莫便因循忘却歸

送隴西秀才入京

國器難藏孰可知携來書劍莫遲遲明年桂
籍登文陣奪取龍頭更是誰

送僧

雪殘春島路迢迢水靜雲開見碧霄別後誰
同此深意只應孤月共寥寥

因仰山氣毳頌

四大假合非虛妄儼儼侗侗為一相東南
北不相知留與衲僧作榜樣

赴翠峯請別靈隱禪師

臨行情緒懶開言提唱宗乘亦是閑珍重導

師并海眾不勝依戀向靈山

送僧歸闕

雪老當年曾入嶺真禪今日又思鄉孤帆隱
隱曾唯我月照夜濤空渺茫

送僧

春風颭颭華正飛紅霞碧靄籠高低越山日
暮少林客應聽子規深夜啼

寄陳悅秀才

水中得火旨何深握草由來不是金莫道莊
生解齊物幾人窮極到無心

寄錢塘觀音朋山主

遠念依依闕附書還同秋水淡相於冲雲况
是曾無定幾掩寒蟾出太虛

送僧

極目春光水照空岸莎汀草碧茸茸三千里
外生靈望獨倚寒藤振祖風

春日示眾二首

門外春將半閑華處處開山童不用折幽鳥
自啣來

門外春將半閑華處處開山童曾折後幽鳥不銜來

寄烏龍長老

雪帶煙雲冷不開相思無復上高臺江山況是數千里只聽嘉聲動地來

寄太平端和尚

千朶危峯杳靄間石房長帶瀑聲寒鳥啼華發尋常事松本青青雪裏看

送僧

千峯雨雪時別我情何極不知天地間更有誰相識

因官人請陞座

曉天雲靜冷涵霜滿檻風清敵夜光莫謂座間人不識孤明孤影射虛堂

因金鵝和尚語藥病

藥病相治見最難百重關鎖太無端金鵝道者來相訪學海波瀾一夜乾

賦冲雲鷄送僧

側翼雄飛天勢闊電閃星流太輕脫南北東西相對看千里萬里阿喇喇

風旛競辯二首

不是旛兮不是風衲僧於此作流通渡河用筏尋常事南山燒炭北山紅

不是風旛何處著新開作者曾拈却如今懜懂癡禪和謾道玄玄為獨脚

漁父

春光冉冉岸煙輕水面無風釣艇橫千尺綵綸在方寸不知何處得鯢鯨

牧童

嘔啊唱與那嗚咿百草拈來聞不知日晚騎牛未歸去指前坡笑又嗑噉

送僧

巖房高下拆寒梅極目寥寥雁影回相別相逢竟何事一聲江上發春雷

寄天童凝

經句抱疾阻春霖沙砌重重蘚暈侵曾約偕遊未能得暮山空鎖碧雲深

送僧入城

雲籠碧嶂月籠臺此去城中早晚回不為佛光謁韓愈問君何事出山來

病中寄諸化主

雪裏梅華見早春東西南北路行人不知何處圓蟾夜同念山頭老病身

和于祕丞見召之什二首

民瘼求來吏放閑萬家深夜啟重關齋中既是清涼國應笑支公別買山

垂垂甘自養衰殘度歲無人到竹闌何幸文星枉嘉什殷勤相喚出層山

和王殿直見寄二首

華野非殊古所難得安閑處未為安大方無外誰相到空笑重雲鎖碧巒

清風凜凜字人官堪對彌天釋道安不日歸朝押鴛鴦也須音問寄層巒

送僧

澄江依棹碧光流風冷蒹葭雨乍收別夜新吟許誰約白蘋汀上月陵秋

送僧歸永嘉

韶石曾披此性靈三年孤與急流爭永嘉舊隱今歸去堪聽海濤中夜聲

兔角拄杖

少室傳來兔角杖，千聖護持為頂相。虎踞龍蟠勢未休，雲影山形冷相向。有時閑倚在虛空，寥寥而地凝秋霜。有時大作師子吼，德嶠臨濟何茫茫。今日提來還不惜，分明普示諸知識。解拈天下任橫行，高振風規有何極。

送從吉禪者

君不見行路難，亦容易。握草為金不為貴，難曾平地湧波瀾。易復到處列祥瑞，堪笑堪悲能幾幾。天上人間立高軌，兄弟十字越參星。一義同心淡秋水，因憶韶陽古風骨。石火電光遲出沒，隔身之句是程途。扣門之間非窠窟，殷勤報君君記取。方外周遊看爪距，虎狼叢不遇知音。剔起眉毛便歸去。

寄承天長老

道義相資復是誰，巖房深夜思遲遲。海山雲靜見孤月，高照婺城人不知。

送僧

古路枝分列洲渚，綱考領考若為舉。病眼方開忽送人，落華驚斷山禽語。親禪客親禪客，行復行獨步。坤維消此情。

送因大師

瘦藤清對紫方袍，閑步坤維意轉高。若到慎江人借問，金輪王子是吾曹。

送實師弟

天倫曾重意，難分爭奈孤。蹤若斷雲去，去休

同亮禪者西山一入杳無聞

送新茶二首

元化功深陸羽知，雨前微露見鎗旗。收來獻佛餘堪惜，不寄詩家復寄誰。

乘春雀舌占高名，龍麝相資笑解醒。莫訝山

家少為送鄭都官，謂草中英

賦月生雲際送誠監寺

皎潔離雲鶴夢時，孤光還與雪相宜。金盆後夜重垂影，拂盡天風不自知。

送僧之金華兼簡周屯田

瘦藤輕屨薛衣并，路過危峯截杳冥。若到金華拂雲霧，不應容易見文星。

送僧之永嘉

故園不是阻天涯，華木光中見獨歸。蜃水鄞江人莫問，月分春浪冷依依。

寄送凝長老

德不孤兮必有鄰，四明留住是因循。如今高步錢塘境，只許靈山箇老人。

放白鵬

朱冠青戩雪為毛，不近鸞鳳意亦高。放你雲

林莫迴首，如今何處是仙曹。

喜禪人迴山

別我遊方意未論，瓶盃還喜到雲根。舊巖房有安禪石，再折松枝拂蘚痕。

送僧

七尺巖藤握便行，舊山歸去幾多程。相逢忽問迢迢意，應發春雷動地聲。

送僧歸天童

栽栽太白峯，倚翠列霄岸。羨君乘興歸，凭欄與誰看。

和曾推官示嘉遁之什

少微星出古風還，而地聲先不掩關。三館峻遷同陌路，九華高卧是蓬山。巖莎步入祥麟穩，海樹飛來白鳳閑。只恐致君休未得，蒲輪重到薜蘿間。

經古堰偶作

出城四十里古堰若天外飛棹清淺中孤影

自相對

謝張太保見訪

老病還同葉半凋經旬門掩夜蕭蕭海城都

護曾垂訪一片清風慰寂寥

送宗朴禪者

洞庭乳竇皆泉石抱疾何緣寄幽跡曾列狂

機一二三東山西嶺非相識屈指頰眉不可

尋雲飛雨散空沉沉如今轉覺流年隔強把

冥悰苦搜索縱止言欺白雪辭寧忘笑與黃

梅客朴禪者朴禪者珠月有光慚照夜

送尚辭

浮屠之子履道為貴天兮地兮何泰何否動

無飾非靜還雕偽辭也云行後生可畏

歌寄留英禪德

當時臨濟辭黃檗或指河南或河北英禪出

日下中峯机案曾焚笑仍則九苞一角慚稱

瑞導月觀星亦非意爭似韶陽振古風半途

未肯還希冀歸去來歸去來飛泉浩浩聲如

雷

送小師元貴

愧爾求師為吾弟子學雖無聞道亦可擬平

飛辯月照復流水斯意斯言兮如不忘行行

颺颺兮步蘭芷善應宗之

送文信歸廬嶽

春色未深興無遲早瓶謝九江峯尋五老到

日攀蘿獨上時依依莫忘海山腦

送侃禪者之丹丘

石橋多古跡路嶮少人過如同白日開冷拂

青苔坐寒老若相逢為吾略嘲破

送實山主

野水春山風光極目千里萬里太遲太速絕

域澄澄兮非犀炬可照希聲杳兮非鳳膠

可續葉落華開知不知人天景行為高躅

示衆

丫角女子白頭絲報你諸方作者知借問住

山何境界春風颺颺春鳥喧喧翠峯不能助

發心印却是他傳

和范監簿二首

吏散廉垂思莫窮山光溪影恣相容誰誇靖

節偏栽柳自笑隱居高聽松丹闕尚遙芝檢

密訟庭闕列薜華重巖間野客雖多病終再

携筇謁士龍

品彙不自適善政還可尋縣樓清夜上島月

思雲侵誰有古菱華照此真宰心

因香嚴和尚

我有一機禪子須知爍迦羅眼總是膠黏若

人借問伏惟伏惟

送雄直歲

罷參還欲勘諸方竿木隨身不易當是則俱

下翻憶古來興化老主賓用盡力牽羊

為道日損

三分光陰二早過靈臺一點不指磨貪生逐

日區區去喚不迴頭爭奈何

疏古

我有面鏡到處懸挂凡聖不來誰上誰下

訪俞秀才

萬疊雲山未得歸寂寥心許老盧知江城雨

雪書名紙不謁鴻儒更謁誰

再訓

萬卷無書道用歸閑文公也未須知倚天長
劍如重戰更有龍頭復是誰
留遲首座

從龍為雨復清閑片段依依水石間慚問秋

風欲吹散不能留得覆青山不慚問者為我留之

送俞居士歸蜀

何處深棲後夢頻青城拋却數溪雲如今老
大歸難得只寫情懷遠送君

和王殿丞襲粟種之什

織織圓實占芳春得自侯門勝楚珍開葉開
華人不會百千年是等閑身

和江橋晚望

公餘縱目望江山萬化窮來罔象間聞說聖
君將下詔未容清淡與僧閑

病起示衆

門掩還同歲月推石窓經雨積莓苔一牀枕
簾淨名老時見斷雲孤月來

送麻居士

紗帽山儀白苧袍遠披孤頂近吾曹携來七

尺霜前竹劃斷天雲不放高

醉李校書

一回辭我一回吟曉巖巖叢意轉深翻謝霜
松不凋落與君同有歲寒心

苦熱中懷寄永固山主

火雲高下影相連詩八幾欲披尋恨不前無限清

風無處問只應遲步繞林泉

送元安禪者

羣峯杳藹留不住遠道依依只藤屨舊隱蘿
龕付與誰寒猿後夜啼高樹

賦病鶴送奉倫禪者

欲飛飛未得冷泊杉松枝如何垂天雲遠速
同一涯

偶作

列岫霽新雨凭欄只澹交夕陽明遠水秋葉
露空巢思極曾無玷神清未動爻只應千古

意誰得共雲坳

謝鮑學士惠臘茶

叢卉乘春獨讓靈建溪從此振嘉聲使君分
賜深深意曾敵禪曹萬慮清

因遊育王亭寄牧主郎給事

冷翠千萬峯當軒列如黛滿園及禪板永日
澹相對彤雲曾無機燒松亦成蓋遠謝幽隱
情難與台星會

送遇能禪者

湖繞嚴城列象寬詩八萬家臺榭水光寒片帆隱
隱生遙極誰問曹溪意轉難

送覺海大師

秋雲巖葉兩悠悠半逐風馳半水流憑問禪
家有何意不知方外若為酬

送曾侍禁

冷匣秋波射斗星鐵衣隨從古霜清宣池莫
問當年事一片威風動地生

病起酬如禪德

大明一寸先腐草一何假人命呼吸間誠哉
是言也呼之曾已休吸之尚未舍寄問諸苦
源來者不來者

送雲禪德

古之送人言作懷寶我慚老病困乏辭藻熊
嶺迢迢方曾立夜雪謝池依依方笑生春草

頭角麟龍安可論清風步步應相計

送久禪德歸蘭亭

右軍墨池月照我復照誰千里忽相到中峯

多病師

送義大師

巖房抱病經一月門有諸生阻來謁長往之
期猶未能七十之年更何說若耶溪老忽留
語溪上舊遊且歸去春風颺颺兮兼斷雲弱
柳依依兮帶輕絮古今離恨雖如此動靜於
吾亦多意高握霜筇獨步時音書莫忘速飛

寄

酬海宗二侍者 二首

孫之得蘭其道匪難扶吾病起如珠在盤一

方二方自看誰看

蘭之得孫其道必存扶吾病起古風入門二

方一方且論勿論

謝郎給事送建茗

陸羽仙經不易誇詩家珍重寄禪家松根石

上春光裏瀑水烹來聞百華

送山茶上知府郎給事

穀雨前收獻至公不爭春力避芳叢煙開曾

入深深塢百萬鎗旗在下風

送郎侍郎致政歸錢塘

帆掛西風別海城二踈千古道相應誰誇富

貴沽時譽自笑經綸作技能殘葉賦題紅片

片遠山供望碧層層武林到日符嘉遁高訪

巖高只許僧

山行逢勳禪德

乳巖秋日無他作策杖層層止寥廓四顧有

誰分野情一點彤雲起深壑蘚石遲遲略輕

踞逢箇衲僧忽驟步頻喚回頭不肯回及至

回方眉卓豎阿喇喇千里萬里橫該抹

送小師元振

老盧之子四三二一將欲振飛卷比叢室松

凌霜方運青水帶巖方流急南北東西雲關

見日

未豐莊新植徑松忽二本鄰偃杼辭紀之

雙偃松何似螺文結數遭清聲雖競發寒影

不相高對客圓分蓋孤禪翠滴袍若教圖畫

得爭奈有蕭搔

送白雲宣長老

鄞江秋晚忽成春況有台星作主人去去高

携古刀尺二千年運續芳塵

送親禪者

萬木帶秋聲古今念睽別我有贈行意臨行

為君說重巖休滯雲遠水且觀月生生知不

知天風助清徹

送顯冲禪者

聚散非常準古今亦標格如何無事人還似

未歸客秋風生羣林野水資寒色誰方謝寸

陰觀彼青山白冲禪行復行五葉待時拆

送天童普和尚

迢迢別海涯帆掛杪秋時島樹落寒葉人誰

訪祖師浪開遊象急天關過鴻遲早晚歸林

下千徒不共知

張秀才下第

得第何人愧不平道存顏巷亦為榮應知未

喪斯文也且把新詩樂性情

寄父監收

田中稻熟及時收顆粒圓成免外求一日歸

來古巖上白雲紅樹共悠悠

暮冬夜坐寄岫禪者

碧落無片雲虛庭積深雪負春還有誰微曙
對孤月巖松影拂翠不斷瀑水聲來聽忽絕
岫禪岫禪知也如未知八面清風遠遠待時

說

寄崇壽懷長老歌

寂住峯兮觸星斗寂住師兮古為道死中得
活未輕訓不許夜行投曉到藹藹聲光一百
年吾其後兮吾其先振領提綱笑多事掩扉
塞路空依然龍胡老盧同兀兀土為貌兮金
作骨萬國爭求肯便行我要重新敲鐵佛東
西南北休云識枯槁冥冥頗相憶天外清風
結陣來狂歌遠寄從拋擲

送廷利禪者

雪峯孤頂誰家路上兮下兮復何故曾列三
千一半徒我今獨滿當時數鯨鱗龍鱗鱗
坤維高步生清塵休云裴相慕黃檗額有圓
珠七尺身利禪者利禪者倚天長劔應牢把
或謂風雲不再來誰為蒼蒼分晝夜

送倅禪者

涪江怒激鯨鼈宅岌岌三山大傾側冥數傲
然一箇來步武羣方作禪客振聲謂我分綱
宗今兮右兮何忽忽今吾強為扶辭句句
字字凜凜生狂風拂散四七單傳之落葉掃
蕩二三直指之流蓬似帶微芒敢未勒絕寒
木在握兮全機可笑秋水橫按兮半提可滅
使八極頂目者不自爭衡見斯人兮駕御昂
赫

送鼎禪者

落落禪家流携笻卷雲毳別我振辭鋒夜堂
消祖偈鼎禪之句霜天飛一鷄目對彈其滯春岸
立千峯指也乎其勢行行復行行清颺起蘭
蕙

觀泉送演禪者

雲根漱野泉照空復照月冷聲曾未消飛瀾
似相別巖近生風雷天遙新冰雪演禪乘興
知不知源流依依共澄潔

答忠禪者

一字七字三五字萬象窮來不為據夜深月

白下滄溟搜得驪珠有多許

和陸軫學士夏日見寄

良牧歸詩匠雅風消鬱蒸官清難滯爵吏散
速同僧崇樹非煙合仙槎碧浪乘因思窮萬
化使君早製圓明鑑圖冠之序引或聞或見令人曠達千古更無能

送化主

春色依依籠遠樹卷杓捲藤躡輕履塵世茫
茫無限人不知誰問曹溪路

送通判劉國博黃中

為星當貳職權化不相饒白屋如多恨清風
何處消岸鷗窺列旆天辟看陸朝別有生靈
意寒枝未變條

送別陳秘丞古意

悠悠層山雲斷兮仍復續離離雙岸草變兮
且兼綠如何苦雪霜後凋盡松竹松竹有節
操雪霜無伎倆敢折歲寒枝贈君作嘉賞行
行天地間清風在誰掌

送通判學士歸南國楊

旆擁帆開照德星天風高興國風清武夷仙
仗知回也各下祥雲到地迎千里之外應之非此則殊待者也

惟師爲善知識行重名當代願爲此銘因機
垂化不亦美乎然重顯固陋荷大君子外獎
敢不從命輒復引寄夫形聲未先曠默奚准
器用之後幽靈絕常故聖人以鍾爲大惟聖
人則之襲考忘考求以深矣其能具諸種智

對飛雄辯但未兼極有生權化之來未易窮
也感通傳稱昔拘留孫於乾竺造青石鍾如
青玉色可容十斛頂類諸天腹陷衆寶八角
四面華光互分有化如來與日偕出明宣秘
演或聞不聞王舍城中大千界內匪同錚錚

者乎今嶽禪老於淮甸造青銅鍾如青珠色
過百鈞之用上旋旁植繞獸蹲熊其或層城
晝開祇園夜永家家霜月射寒影以爭輝殷
殷地雷發虛音而交振師之唱險資之繼難
寅夕鏗鏗主伴索索足使一鱗半甲無違真

化之方二聽五觀有寄神遊之域善存殊應
扣惟良哉謹爲銘曰
淮之要衝 眞之會府 中列梵摩 居我禪祖
參徒駢羅 慧敏千楮 爰構鯨音 息彼輪苦
峻橫崇臺 金飛碧回 斯門屢掩 向人或開

希考微考 作延乍催 先聞未及 後時不來
增悲遐宣 無因天理 帶識萬端 警悟齊起
遵晦陟明 其母得子 塵塵訪誰 判利問已
大緣斯成 大功不宰 君奉禹湯 臣仰元凱
碑勒紺園 銘寡文彩 庶期妙峯 永聳滄海

明覺禪師祖英集卷第六

明州雪竇山資聖寺第六祖明覺大師塔銘

尚書慶長外郎直秘閣兼充館校尉賜紫崇文直學士

夫真空不空是有無證寂滅不滅是往來相
佛以權實一法開頓漸之徑使隨器而趨之
有不離道場得大智慧有難行苦行爲人天
業日月爲明矣而盲者不見睫毛舟楫可濟
矣而溺者淪於波浪人之未有惡明而忘濟
者其心一也其途異矣昆蚊之性羣行食啄
倦則息觸則避求所以安樂不待教而能也
人之於貴賤貧富壽夭得喪不知自然之分

愛惡悲欣廉貪靜躁糾纏桎梏無所解脫盡
勞形骸夜動夢寐至于老死且不知息彼昆
蚊知所以安樂人顧不能也佛之教人推性
命之際以極天地之外乃至觀身如掌中物
傳付法寶不寓文字是謂禪那山嶽之大有

時而泐金石之剛有時而剝形器之用也我
則異於是無去無住無取無離不見于內不
見于外不見中間自利義也利他仁也是謂
涅槃妙心諸佛法印無上微妙秘密圓明眞
實正法眼藏佛以授摩訶迦葉傳僧伽黎衣

以待補處出世爲成道之符自是衣法相傳
二十有七世香至王子初入中國諡曰圓覺
圓覺傳大祖大祖傳鑑智鑑智傳大醫大醫
傳大滿大滿傳大鑑大鑑藏衣傳法而已大
慧繼之大寂承之其後皆以所居稱若天皇

龍潭德山雪峯雲門香林智門其世次也禪
師諱重顯字隱之大寂九世之孫智門之法
嗣也俗姓李氏母文氏以太平興國五年四
月八日生大師於遂州始生瞑目若寐三日
既浴乃豁然而寤屏去葷血不習戲弄七歲

有僧過其門挽袂哀喜不自勝聞梵唄之聲輒泣下父母問其故懇請出家父母執不可師不食者累日咸平中終父母喪詣益州普安院仁銑師落髮為弟子大慈寺僧元瑩講定慧圓覺疏師執卷質問大義至心本是佛由念起而漂沉同夜入室請益往復數四瑩不能屈乃拱手稱謝曰子非滯教者吾聞南方有得諸佛清淨法眼者子其從之彼待子之求也久矣師於是東出襄陽至石門聰禪師之席居三歲機緣不諧聰諭之曰此事非思量分別所解隨州智門祚禪師子之師也師乃從錫而詣之一夕問祚曰古人不起一念云何有過祚招師前席師攝衣趨進祚以拂子擊之師未曉其旨祚曰解麼師擬答次祚又擊之師由是頓悟尋往廬山林禪師道場問之曰法爾不爾云何指南林曰只為法爾不爾師遂拂衣而退眾皆股栗有毀於林者林諭眾曰此如來廣大三昧也非汝等輩以取捨心可了別也師辭往池州景德寺為首座為眾解聲法師般若論知州曾公會

以果子抵于地曰古人云不離當處常湛然即今在何許師指景德長老曰只此長老亦不知落處曾公云上座知也不得無過師曰明眼人難瞞師南遊杭州住持蘇州洞庭翠峯嗣智門也未幾曾公出守明州手疏請師住持雪竇資聖蘇人固留不可師曰出家人止如孤鶴翹松去若片雲過頂何彼此之有雪竇本智覺禪師道場智覺亦雪峯五世孫備傳琛琛傳益益傳韶而壽繼之智覺其號也一法同源而地有盈虛師之至猶家焉決潢汗變清泚撓變偃爭迅馳州邦遠近輻輳座下駙馬都尉和文李公表錫紫方袍侍中賈公又奏加明覺之號師住持三十一載度僧七十八人先是門弟子建壽塔於寺之西南五百餘步一日命侍者灑掃塔亭行至山椒歷覽久之曰自今過此何日復至左右皆大驚眾迎師還師堅指塔所眾皆號泣隨至塔前或曰師無頌辭世耶師曰吾平生患語之多矣翌日出杖屨衣盂散遺其徒有問疾者留食殷勤與之約曰七月七日復來相見

其夜盥浴整衣側卧而滅時皇祐四年六月十日俗壽七十三僧臘五十夏以七月初六日入塔如師之約嗚呼師得妙用善機不取諸法能知去來達性命故方是時陞堂皇遊墻藩者悟性相體空頓息萬緣為大乘法器曰義懷在和凡百五十人傳其法於天下彼遮護意根網絆初心背覺合塵逐念流徙得少為多妄立知見雖三詣投子九陟洞山師亦援手濡足而無以救之是猶孔子之有宰我孟子之有盆成括非其師之過也自師出世門人惟益文軫圓應文政遠塵允誠子環相與哀記提唱語句詩頌為洞庭語錄雪竇開堂錄瀑泉集祖英集頌古集拈古集雪竇後錄凡七集師患語之多而其徒愴然猶以為編播有遺蓋利他之謂也余得其書而讀之二十餘年雖瞻仰高行而祿利所縻無由親近使得稽首避席霑彼法雨覺悟塵勞庶幾可教者今茂如之何師辭世十有三年碑表未立餘杭僧惠思撰行業錄與其徒元圭覺濟大師悟朋繼踵衷文請銘以予跋慕之

心重之以門人之請之勤抑有待耶愚公叩
壤以移山雖不量力其誠則至矣謹焚香再
拜繫之以銘曰

噫惹愚 背本源 一念異 生二根
勝與劣 駟馬奔 嗜所得 自詐誤
失大道 南北棘 艾至老 愉朝昏
正徧覺 人天尊 迷者挽 溺者掀
朝嗽出 慧靈雲 渴得漿 寒得薪
悟報化 知非真 趣安隱 擺客塵
王叔生 廣佛事 破六宗 應彈指
法來東 非會際 信衣傳 隻履逝
頂五山 真法器 立積雪 殊其臂
忍非忍 得法髓 債必償 有裔嗣
皖公潛 佛日翳 翩南遊 立如楸
乞解脫 彊哉慧 攘蜂蠆 神嶽衛
破頭峯 衆雲從 橫六氣 醜二宗
教任意 任懶融 黃梅兒 陌上童
闕七相 了諸空 聖服勞 杵臼傭
和心偈 拈爭鋒 夜南驚 懷是逢
帝稽首 睇下風 舟復新 葉歸叢

有道得 無心通 世有承 四衆依
燈相續 墳應荒 師異粟 自孩提
斥腴雋 蹈聖梯 慈固拒 不得施
起恭孝 終苴練 銑落髮 瑩質疑
漢之東 得我師 扶盲瞶 柞荒菑
昔無有 今委蛇 遇露洽 發萌莠
淫龜鳴 鍾未簷 魚目藏 明珠吐
歸二山 下檐聚 來萬里 足齒踞
旬春雷 披蟄戶 辯縛解 決去住
沃醍醐 斟甘露 百五十 曹蕃廡
窮車轍 誦句語 瞻骨目 軸繪素
速胡越 近杖屨 捐麤相 悉開悟
山第鬱 泉呬幽 虎跡交 毳猱啾
塔門闕 松柏樛 天南垂 海彪彪
囊破褐 笈單綢 來環繞 五體投
名彊身 祿飽喉 犏怨憎 甘鮑鱗
睨真乘 等贅疣 慶我生 辯薰藉
靳誘掖 邀無由 琢堅石 據我憂
治平二年乙巳歲二月五日

明覺禪師祖英集卷第六
校勘記

- 一 底本，明永樂北藏本。
- 一 九〇七頁上一行書名，[南]作「明覺禪師語錄卷第六」。
- 一 九〇七頁上二行「參學小師文政編」，[南]作「僧錄司右闡教兼靈谷禪寺主持淨戒重校」。
- 一 九〇七頁上四行首字「子」，[徑]作「予」。上六行第一一字，[南]、[徑]同。
- 一 九〇七頁下一九行末字「折」，[徑]作「折」。一〇一頁中一三行第五字同。
- 一 九〇九頁上三行首字至一一行末字「送……看」，[南]無。
- 一 九一一頁上三行首字「空」，[南]作「堂」。
- 一 九一一頁上四行「臨濟」，[南]作「臨際」。次頁上一七行同。
- 一 九一二頁中末行「二首」，[南]無。
- 一 九一二頁下五行首字「品」，[南]作

「又品」。

一 九一四頁中一〇行首字「誰」，經作「人」。

一 九一四頁下一一行末字「拆」，經、清作「折」。九一六頁中一二行第一〇字同。

一 九一五頁中四行第四字「右」，南、經、清作「古」。

一 九一六頁上一一行第二字「藏」，經作「嚴」。

一 九一六頁中一五行第四字「墮」，經作「廣」。

一 九一六頁下四行第二字「紀」，南作「寄」。

一 九一六頁下末行第五字「悟」，經作「悞」。

一 九一七頁上九行第一三字「偕」，南作「俱」。

一 九一七頁中五行第一〇字「期」，經作「其」。

一 九一七頁中六行卷末書名，南作「明覺禪師語錄卷第六」。

一 九一七頁中六行卷末書名後塔銘全文，南無。

一 九一九頁中三行第九字「拒」，經、清作「拒」。